


ESIKA YA KOSAMBELA

OYO NZAMBE APONI

 Tótikala ya kotelema mpo na ngonga moke, wana togumbi mitó mpo na kobondela. Sikoyo, wana togumbi mitó, pe natii motema ete mitema na biso pe egumbami, Nazomituna bato boni bazali awa na mpokwa oyo, baoyo bakolinga ete tókanisa bango na libondeli, mpo na likambo moko ya sikisiki? Okolinga kotombola kaka loboko, koloba: “Nzambe, pesa ngai, na mpokwa oyo, eloko oyo nazali koluka.” Nkolo ápambola bino.

² Tata na biso na Likolo, wana topusani sikoyo, na komikitisa, liboso ya Ngwende monene ya ngolu oyo, na kondima, tokoti na Misándá yango; epai wapi Nzambe, Banje, Bakeluba, ná mampinga nyonso ya Likolo basangani elongo. Mpo Alobaki ete ata ndeke oyo mwanó, ekoki kokweya na mabele te, kozanga ete Tata na Likolo áyeba yango. Koleka boni Ye ayebi, ntango nkama na nkama na bato awa bagumbi mitó, pe bazali kobelela Yo mpo na bosenga moko ya sikisiki. Tata, kitisa miso likolo na mokili oyo ya bosenga na mpokwa oyo, mpo tozali bato na bosenga.

³ Pe nabondeli, e Nzambe, ete lokola tosangani awa pe totalisi epai na Yo kondima na biso na Nzambe na bomoi oyo ayanolaka mpenza na libondeli; tosili kobima na mokili ya baoyo bazangi kokatama ngenga, ya motema pe matoi, tobimi mpo na kobika bomoi oyo ekabwani, pe kobika na kotatoláká kondima na biso epai na Yo. Na mpokwa oyo totomboli maboko, pe tolobi: “Tozali na bosenga.” Nzambe molingami, yanola na bosenga na bango moko moko.

⁴ Na bongo, Tata, tobondeli ete Óya kotala biso na mpokwa oyo kati na Liloba. Toyei awa mpo na kosembolama, mpo na kososola, mpo tóyeba ndenge ya kobika na mokolo ya lelo; eloko nini ya kotalela, likambo nini kosala. Mpo, toyebi ete Boyei na Nkolo ekómi pene, kokokana na bilembo nyonso oyo basakoli basila koloba liboso. Tozobelema pene na ngonga yango, Nkolo, ntango lisiko mobimba mpenza ekopesama na bana na Yo. Nzambe, tika ete biso nyonso tózala kuna, Tata. Tika ete moko ázanga te. Yango nde ntina na biso ya kozala awa, Nkolo. Tolingi Yo, pe tozali komeka komilengela mpo na ngonga wana.

⁵ Loba na biso, tosengi lisusu, na mpokwa oyo. Pe bikisa babeli. Babeli ná bato ya mpasi nyonso oyo bazali kati na ndako oyo, tobondeli ete Óbikisa bango, Nkolo; koleka mingi mpenza baoyo bazali na bosenga na molimo. Tobondeli ete Óbikisa elimo nyonso oyo ebúngá. Tondisa mondimi nyonso na Molimo Mosantu. Pe pesa makasi pe Nguya ya sika na bana na Yo

oyo bazali kondima. Kokisa makambo oyo, Tata. Tosengi mingi, mpo Olobaki na biso ete tósenga, “bósengaka mingi, bósengaka makambo minene, mingi na yango,” mpo esengo na biso éfuluka. Pe tosengi yango na Nkombo na Yesu Klisto. Amen.

Bokoki kofanda.

⁶ Namoni mpenza ete oyo ezali litomba monene na mpokwa oyo, ya kozala lisusu awa na etumbelo, awa na école secondaire oyo, mpo na kokutana na bato malamau oyo basangani awa mpo na koyoka Nsango-malamau. Nasengi ete mawa na Nzambe ézunga ngai mpo náyebisa bino Solo na ndenge mpenza ngai nayebi Solo yango. Azali bobele na makoki ya kokanga monoko ya moto, kaka ndenge Akokaki kokanga monoko ya nkosi. Pe soki esalemi ete nameki ata koloba likambo moko ya lokuta, pe ya kokesene na mokano na Ye, libondeli na ngai ya sembo ezali ete Ákanga monoko na ngai, mpo náloba yango te. Mpamba te, na bosolo, ngai moko pe nalingi kozala na Lola; pe nakotikálá kozala kuna te, pe, likolo na nyonso wana, nakozala mokambi ya lokuta, moto oyo asalá likambo na ndenge ya lokuta. Soki nasali yango, ezali mpo nayebi eloko mosusu te. Nkolo ápambola bino.

⁷ Sikoyo, lobi na ntongo, soki ezali mokano na Nzambe, nakani koteya likolo na likambo yango, *Libala Pe Koboma Libala*. Pe totii motema ete bokoya, pe bóya na bikomeli pe nkasa na bino. Tokozua ntango molai te, kasi nakosepela kaka ko... Yango nde ntina na ngai ya liboso ya kozala awa, na Indiana, mpo nalakaki bino yango. Pe nakomeka, lobi na ntongo. Soki nasali yango lobi na ntongo te, nakosala yango lobi na mpokwa. Kasi nakomeka lobi na ntongo, soki Nkolo alingi, koteya na ntina na likambo yango, biteyelo ya makanisi mibale yango. Pe tika ete Nzambe ázunga biso koyeba nini ezali Solo, koyeba mpenza nini ezali Solo, mpo tókoka kotambola kati na Solo pe kati na Polé. Bisó... .

⁸ Boyebi, nazaláká na mobange moninga moko ya moindo. Alobaki na ngai, alobaki: “Ndeko Billy,” alobaki, “na—nalingi mindondo te na ebale.” Alobaki: “Nalingi kozala na tiké na ngai na loboko. Pe ntango mpiólóló ekobeta, nalingi mindondo te kuna. Nasengaki na Nkolo, eleki ntango molai, ete soki eloko moko ya mabe ezali, tika ete ná bongisa yango sika-sikoyo,” alobaki, “mpo ekozala molili pe mopepe makasi na ntongo wana ntango masuwa ekotiola na ngámbo mosusu.” Alobaki: “Nalingi mokakatano moko te. Nalingi kotalela makambo nyonso wana sikoyo.” Yango nde ntina oyo tozali awa, komeka kobongisa mikakatano nyonso wana, mpo tókoka kokota na masuwa na ngonga wana.

⁹ Sikoyo, nakoloba na bino ntango molai te, na mpokwa oyo, mpo tozali na mayangani mibale lobi. Na sima nakokende mbala moko, esika mosusu, na liyangani mosusu, mayangani mosusu ebele.

¹⁰ Kasi, sikoyo, na Buku ya Deteronome. Nalingi kotánga na mokapo ya 16, milongo misato ya liboso, ya Deteronome 16:1 kino 3.

Kanisa sanza na Abibu, mpe senzela elekeli. . . YAWÉ Nzambe na yo: . . . na sanza (ya minei) ya Abibu nde YAWÉ Nzambe na yo abimisaki yo na—na Ezipito na butu.

Yango wana okokaba mbeka ya elekeli na YAWÉ Nzambe na yo, ya etonga ya bampate mpe oyo ya bangombe na esika oyo YAWÉ asili kopona mpo na kotia nkombo na ye kuna.

¹¹ Sikoyo, liteya na ngai na mpokwa ya lelo ezali: *Esika Ya Kosambela Oyo Nzambe Aponi.*

Soki botali malamú, sanza ya A-b-a-d. . . -b ezali, elingi koloba “sanza ya minei.” Na sanza ya minei ezali ntango babimisaki bango.

Sikoyo likambo ya kokamwa ezali ete biso, na mpokwa oyo, lokola basambeli ya Nzambe, na mokolo oyo tozali kobika kati na yango, tokómi koyoka makanisi mingi mpenza ya ndenge na ndenge ya bato. Na ntango nyonso oyo makanisi ya ndenge na ndenge ezali mpo na likambo moko, mituna ya ndenge na ndenge; esengeli kozala na eyano bobele moko ya solo mpo na motuna nyonso oyo etunami.

Soki natuni motuna oyo: “Oyo ezali nini?”

“Ee,” bakoki koloba, “eteyelo.”

“Ezali mpo na nini?” Bomoni?

¹² Sikoyo, kuna, moto moko akoki koloba: “Ezali eteyelo te. Ezali libaya.” Ee, ezali libaya, kasi, ata bongo, ezali eteyelo. Bomoni, esengeli kozala na eyano moko ya solo mpo na yango.

Pe soki natuni motuna na ntina na likambo moko boye, eyano moko ya solo esengeli kozala. Ekoki kozala na eyano moko pene na yango; kasi esengeli kozala na eyano moko ya solo, ya semba na motuna nyonso. Boye, na yango, motuna nyonso oyo ekómaka na bomoi na biso, esengeli kozala na eyano moko ya solo, oyo ebongi.

¹³ Sikoyo, lelo, biso toyokaka—toyokaka yango kolobama, mingi na bato na biso mpenza na mokili lelo. . .

Lokola ntóma, nasálá mibembo mingi na mikili mosusu pe na mokili mobimba, nakútáná na ba-losambo mingi ya ndenge na ndenge, ndakisa ba-Bouddha, ba-Mizilmá, ba-Sikh, ba-Djaïn, bamosusu, ya ba-losambo ya mokili. Pe na sima awa na Etats-Unis, epai na biso moko; pe na bikólo mosusu ya bapaya, nakútanaka na mangomba na biso ya ndenge na ndenge, ndakisa mangomba na biso ya ba-denomination, kobanda na Katoliko ya Roma ya ebandeli, na bongo oyo ya Greki, pe bongo na bongo, pe mi—milulu ya ndenge na ndenge, pe kokita kino na. . . bileko

nyonso ya ba-denomination, ya ba-denomination koleka nkama libwa pe ya ndenge na ndenge ya ba-Protestant.

Sikoyo, moko na moko na bango, na ntembe te, okoki koyeba likanisi na bango, pe nakoki kopamela bango te. Moko na moko alobaka ete bango nde bazali solo, ete bango nde bazali na solo. Pe bato oyo basambelaka na mangomba yango basengeli kondima yango, mpamba te bafándísá esukeli na—na bango, esukeli na bango ya Seko, likolo na malakisi ya lingomba wana. Pe bazali na bokeseni ebele mpenza, bamoko na bamosusu, na lolenge ete ebimisi mituna ya ndenge na ndenge koleka nkama libwa.

Yango wana, lokola mituna ya ndenge na ndenge koleka nkama libwa, esengeli kozala na Eyano ya solo moko. Pe nakolinga ete biso, na mpokwa oyo, lokola tozali koluka kokende na Lola, mpo na kokutana na Nkolo na biso Yesu Oyo biso nyonso tolingaka, nakolinga koluka-luka kati na Makomi mpo na komona yango.

¹⁴ Sikoyo, soki ezali motuna ya Biblia, boye esengeli kozala na eyano ya Biblia. Esengeli kouta na lisanga moko ya bato te, na bondeko moko boye te, to na molakisi moko boye te, to na denomination moko boye te. Esengeli kouta semba na Likomi, esika ya kokutana na Nzambe ezali, mpo na kosambela. Pe na ntembe te, lokola Nzambe, ezali na esika moko ya kokutana, oyo Ye akutanaka na bato.

¹⁵ Sikoyo, tomoni awa, na Deteronome awa, na ebandeli, ete Mose azotanga lisusu Likomi, makambo oyo asilaki koyebisa bango, ndenge Abimísáká bango na loboko monene, ya nguya, na Ezipito, pe abandisaki bango liboso.

Babengamaki “libota na Nzambe,” kino bábima na Ezipito, bongo na sima babengamaki “lingomba na Nzambe.” Mpamba te, lingomba ezali lisanga, to, na bosolo, *lingomba* elingi koloba “baoyo babengami kobima,” baoyo babengami bábima. Pe babimaki na Ezipito, mpo bákóma lingomba.

¹⁶ Sikoyo Nzambe alobaki na bango, ntango ba...liboso bátonga tempelo pe nyonso oyo basalaki: “Nakoona esika ya kosambela Ngai, pe Nakotia Nkombo na Ngai kati na yango.” Pe yango nde esika bobele moko oyo Nzambe akokutanáká na moto nyonso, esika oyo Ye Moko aponaki. Aponaki esika na Ye, pe esika na Ye oyo Aponaki, Atiaki Nkombo na Ye, molongo ya 2 nde eyebisi biso yango awa; Akotia Nkombo na Ye na esika oyo Asiláká kopona mpo na bato básambela Ye kuna. Sikoyo, likambo ezali ete, tozali na mposa ya komona epai wapi esika yango ezali.

¹⁷ Ná makanisi nkama libwa ya ndenge na ndenge, komona ete toleki ba-losambo nyonso ya bapakano, pe tozolibela kaka boyambi ya Baklisto. Oyo kutu, nazalaka na mposa ya kosala malamumu mpo na bapakano, soki te, na ntembe te, nalingaki

kozala te moto ya kokendéké kuna kosololáká ná bango. Kasi, bazali na libunga. Boklisto ezali losambo bobele moko oyo ezali solo, Boklisto nde ezali. Pe nazoloba yango mpenza te mpo nazali Moklisto; ezali mpo nandimi ete ezali Solo. Ezali losambo bobele moko oyo ezali solo.

¹⁸ Nakendé na nkunda esika oyo babongolaka mpunda ya pembe sima na ngonga minei nyonso. Esika, Mahomet, nganganzambe monene pe—pe mokambi, be na sima na Klisto, elobamaka ete azalaki mosakoli, pe, natii yango ntembe te, azalaki yango be sima na bandeko mibali Macchabée. Kasi ntango bango... Akúfá. Alobaki ete akosekwa pe akokonza mokili mobimba. Sikoyo, pene na ngonga minei nyonso, babongolaka basínzílí, pe batiaka ntango nyonso mpunda moko ya pembe na nkunda na ye. Basalaka bongo, mibu nkóto mibale ekoki, bazelaka ye ásekwa pe ákonza mokili. Kasi bomoni . . .

¹⁹ Pe soki bokei epai ya Bouddha; Bouddha abikaki eleki mibu nkama na nkama, pene na mibu nkóto mibale na nkama misato, nzambe ya—ya Japon. Na bongo azalaki philosophe, mwa moke lokola Confucius, ná bamosusu.

Kasi bango nyonso oyo, mpo... babandisi, pe bongo na bongo, bango nyonso bakúfá ná philosophie na bango, bakundámá pe bazali na kati ya nkunda.

Kasi Boklisto, oyo ebandisamaki na Yesu Klisto, ezali na nkunda moko etikálá mpamba. Azali Moto kaka moko oyo atikala kozala na mokili, oyo azalaki na bomoi pe alobaki: “Nazali na nguya ya kopesa bomoi na Ngai pe ya kosekwisa yango.” Pe Asalaki yango. Pe Azali na bomoi lelo.

Pe toyebi ete Azali na bomoi, mpo Ye azali elongo na biso pe azali komitalisa polele Ye moko na nzela ya bilembo pe bikamwa, oyo Alakaki ete Akosala mpo na kotalisa yango. Na lolenge ete, Likonzi na Móto oyo ekambaki bana ya Yisraele kati na bilíki, Ezali elongo ná biso lelo, ata fotó na Yango ezuamaki; kosaláká bilembo pe bikamwa oyo Alakaki ete Akosala na mokolo oyo, komona Maloba nyonso oyo Alakaki ezali komonisama polele lelo. Yango wana, mokili mobimba ya bapakano ezali libanda. Ezali nde Boklisto!

²⁰ Sikoyo, lokola mituna eleki nkama libwa na ntina na esika oyo Nzambe akutanaka na bato: “Akutanaka ná ba—Metodiste, to Akutanaka na ba—Batiste, pe Akutanaka ná *oyo*, *oyo kuna*, pe *mosusu*.” Sikoyo, motuna moko ezali wana, boye moto na moto asengeli koluka lobiko ya molimo na ye moko na somo pe kolénga.

Kasi na mpokwa oyo, nalingi koluka komona, pe kotalisa polele na kati ya Likomi, esika nini ebongi mpenza, epai wapi Nzambe akutanaka pe asámbelaka elongo ná bato. Pe, soki ezali bongo, yango nde esika bobele moko oyo Akokutanáká ná moto.

²¹ Sikoyo, tozui eteni oyo na Deteronome. Liloba yango ezali na ki-Greki, ezali na ndimbola mibale, to, elingi koloba “mibeko mibale.” Liloba yango na ki-Greki, *Deteronome*, elingi koloba “mibeko mibale ya kokesene.”

Pe yango nde makambo oyo Nzambe azalaka na yango, mibeko mibale ya kokesene. Moko na yango ezali mobeko ya liwa, pe oyo mosusu ezali mobeko ya Bomoi. Nzambe azalaka na mibeko mibale. Kolanda Ye, kosalela Ye pe kosambela Ye, ezali Bomoi; koboya Yango ezali liwa. Mibeko ezali mibale epai ya Nzambe.

²² Sikoyo, moko na mibeko yango eyeban-...epesamaki na mokili, na Ngomba Sinai. Nzambe apesaki mobeko yango na Mose pe na Yisraele. Ezali te ete mobeko yango ekokaki kosunga bango, kasi mobeko yango etalisaki bango kaka ete bazalaki basumuki. Kino ntango wana ékoma, bayebaki te eloko nini lisumu ezalaki, kino bazua mobeko. Mobeko ekoki kozala te soki etúmbu ezali te. Mobeko ezali mobeko te, soki ezangi etúmbu. Boye, yango wana: “Kobuka mobeko ezali lisumu, pe lifuti ya lisumu ezali kufa.” Yango wana, kino Nzambe ápesa bango mobeko, kobuka mobeko moko te etangamelaki bango.

Soki mobeko moko ezali awa te oyo elobi ete okoki koleka kilometre ntuku misato na mibale na ngonga moko, boye okoki na yo koleka kilometre ntuku misato na mibale na ngonga. Kasi soki mobeko moko elobi ete okoki kosala yango te, na bongo mobeko ezali, ná etúmbu sima na yango.

²³ Sikoyo, liwa, mobeko ya liwa, ezalaki mibeko oyo epesamaki likolo ya Ngomba Sinai, oyo eyebisaki moto ete azali mosumuki. Pe, kobuka mobeko ya Nzambe, azalaki kokufa. Kasi lobiko ezali te na kati ya mobeko. Mo...Ezalaki kaka policier oyo akokaki kobwaka moto na boloko; ezalaki na eloko ya kobimisa yo kuna te.

Kasi na sima, Apesaki mobeko mosusu, oyo wana esalemaki na Ngomba Kalvari, esika lisumu etángamaki likolo na Yesu Klisto, pe kuna, amánde efutamaki. Pe ezali te ná...Kozanga mobeko, “kasi bobikisami na ngolu,” na ngolu ya Nzambe, na nzela ya kobongisama liboso, ya boyebi liboso ya Nzambe na oyo etali bomoto na yo.

²⁴ Sikoyo tomoni mibeko mibale oyo, Deteronome, kolobela mibeko mibale. Mibeko ezalaki mibale. Moko ezalaki mobeko ya liwa, pe oyo mosusu, mobeko ya Bomoi.

²⁵ Ezalaki pe na boyokani mibale oyo epesamaki na bato. Tokolobela yango na ntongo.

Moko na yango epesamaki na Adama, ezalaki na mobeko, “soki osali *oyo* pe osali oyo *wana* te,” kasi mobeko yango ebukamaki. Adama, Eva moto abukaki yango, na elanga ya Edene.

Na sima Nzambe asalaki boyokani ya mibale, pe apesaki yango epai na Abraham, pe mobeko yango ezalaki na eséngisi te. “Etali te eloko nini osili kosala to eloko nini okosala,” Alobaki, “Ngai nasili kosala yango.” Wana nde ngolu. Wana nde mobeko ya Bomoi. Nzambe asalaki yango mpo na Abraham ná Momboto na ye sima na ye, elingi koloba, Momboto nyonso ya Abraham.

Ndenge Biblia elobi: “Yisraele mobimba ekobika,” kasi elingi koloba te Bayuda. Ndenge Polo alobaki: “Baoyo bazali Yisraele na kati, to Yisraele na libanda.” “Na libanda,” ndenge tolobelaki yango na mpokwa oyo eleki, ezalaki bana ya Yisaka, na nzela ya kosangana na nzoto. Kasi mobeko ya Nzambe eyaki na nzela ya Klisto, oyo ezalaki Momboto Mokonzi ya Abraham, ete “na ngolu, Yisraele mobimba ebikisami.” Elingi koloba: “Baoyo nyonso bazali kati na Klisto babikisami,” bango nyonso, boyokani ya mibale ya Nzambe. Kasi makambo nyonso oyo ezalaki elilingi kotalisa Klisto.

²⁶ Sikoyo bótala molongo ya 2. Molongo ya 2, awa na Deteronome 16: “Bósambela na esika oyo Ngai nasili kopona.” Sikoyo bosengeli kosambela Nzambe, Alobaki: “Na esika oyo Ngai nasili kopona,” ezali te oyo moto mosusu aponaki, kasi, “oyo Ngai nasili kopona.”

Sikoyo, soki Nzambe aponaki esika moko, esengami na biso ete toluka koyeba eloko nini Ye alobaki na ntina na yango. Pe ezali wapi? Nazali na mposa ya komona yango, mpamba te, nazali solo mpenza na mposa ya kosambela Ye.

Biso nyonso tozali awa, na mpokwa oyo, mpo na kosambela Ye. Tofandi awa na mpokwa oyo, lokola ba-Methodiste, ba-Batiste, ba-Katoliko, ba-Témoin de Jéhovah, ba-Chrétien scientiste, pe nyonso wana, kasi biso nyonso tozali koluka eloko moko.

Tozali na mposa ya koyeba Solo. Biblia elobi: “Bokoyeba Solo, pe Solo ekosikola bino.”

Moto moko, okoki koyeba te eloko oyo ozali kosala, okoyeba te ndenge ya kosala yango, kino óyeba ndenge ya kosala yango; okoyeba te eloko nini ya kosala, kino óyeba ndenge ya kosala yango, yango nde nalingaki koloba. Osengeli koyeba eloko nini ozali kosala pe ndenge ya kosala yango.

²⁷ Likambo oyo etalisi biso ete Nzambe azali na esika ya kokutana mpo na basámbeli na Ye, na esika moko boye. Bobele na esika wana nde Nzambe akutanaka ná basámbeli na Ye.

²⁸ Sikoyo, lisusu, esika oyo Asili kopona mpo na basámbeli na Ye, nde Alobaki Akotia Nkombo na Ye. Sikoyo tóluka pe tómona, na nzela ya Likomi, epai wapi esika yango ezali. Na ntembe te, soki Nzambe alobaki ete Akotia Nkombo na Ye na esika oyo Asilaki kopona mpo ná kokutana na bato mpo na kosambela elongo ná bango. . . to, kútu nde, mpo bango básambela Ye, ete ezali esika moko na Biblia, mpo ezalaki mpo na bileko nyonso.

²⁹ Pe Nzambe monene oyo abongwanaka te, akoki kobongwana te. Moto abongwanaka. Kasi okoki kotia bomoi na yo likolo na eloko nyonso oyo Nzambe atikálá koloba na ntango nini, mpo ezali Solo. Ezali Solo. Mpamba te, yango nde eloko bobele moko oyo nakoki kotiela motema, ezali Biblia. Mpamba te, liloba ya moto ekokweya, kasi Nzambe aleki likolo.

Na mobu oyo nasengeli koyeba mingi koleka oyo nayebaki na mobu eleki. Bino pe, bosengeli, mokolo na mokolo. Tozali na suka, na bongo, tobakisaka boyébi.

Kasi Nzambe azali na suka te. Azali na suka te. Pe, lokola azali na suka te, Akoki pe kobakisa boyebi te. Abongá be, mpo na kobanda. Mokano nyonso esengeli mpenza kozala malamau.

³⁰ Pe lolenge oyo Nzambe asalaki mbala ya liboso, Asengeli kosala ndenge wana libela na libela, soki te, Asalaki libunga ntango Asalaki mbala ya liboso. Soki moto atikálá koya epai na Nzambe mpo na lobiko, likolo na moboko oyo Ayambelaki ye, yango esengeli koyambama mbala nyonso na moboko moko wana. Ezali solo. Soki moto moko atikálá koya epai ya Nzambe mpo na kozua lobiko na nzoto, pe Nzambe ayambaki ye likolo na moboko moko boye, moto oyo akolanda, Ye asengeli koyamba ye ndenge moko, soki te, Asalaki libunga ntango Ayambaki moto ya liboso. Nzambe asilá kopesa moboko oyo Ákutanela ná moto. Asilá kopesa moboko ya oyo Akosala, ndenge Akosala yango, pe yango ezalaki na nzela ya makila ya mbeka ya mwana-mpate na elanga ya Edene. Nzambe atikálá kobóngola yango, na ntango moko te, ata moke te.

³¹ Akanaki ndenge nini Akobikisa moto. Lelo, toluká kobikisa moto na nzela ya kelasi; toluká kotángisa bango, toluká kokotisa bango kelasi, toluká kokonza bango, toluká kosala makambo mosusu ya ndenge na ndenge; kokotisa bango, koningisa bango mpo bákota, kobatisa bango mpo bákota, na ndenge nyonso oyo ezali, kokoma mikanda mpo na kokotisa bango. Kasi ezali kaka ndenge moko, Nzambe akutanaka na moto na nse ya Makila ya Mwana-mpate oyo esopanaki. Makila ezalaki nzela na Nzambe na ebandeli, pe Makila ezali nzela na Nzambe na mpokwa oyo. Ezali malamau koniokola nzoto pe kosala makambo nyonso oyo, kasi lobiko eyaka kaka na nzela ya Makila. Makila ezali nzela bobele moko oyo Nzambe aponá mpo na kobikisa moto, pe Akoki kobongola yango te.

³² Yobo azalaki na likambo yango moko. Ayebaki ete azalaki moyengebene, mpo asilaki kopesa mbe—mbeka oyo Nzambe asengaki na ye.

³³ Sikoyo, tika ete tóluka sikoyo mpo tómona soki esika yango ezali nini, esika oyo Atiá Nkombo na Ye. Ekosengela tómona esika oyo Atiá Nkombo na Ye. Na bongo, soki tomoni nini Nkombo ya Nzambe ezali pe esika oyo Atiá Yango, na

ntango wana, tokoyeba esika ya kosambela, kaka na ntango oyo tomoni yango.

Makambo nyonso oyo, na ntembe te, ezalaki bililingi ya makambo oyo ekoya. Mobeko mobimba ezalaki elilingi ya makambo oyo ekoya.

³⁴ Kaka ndenge sanza ezalaka elilingi ya moyi. Esalaka mosala na ntango moyi ezali te, kaka ndenge Lingomba esengeli kosala mosala ntango M-w-a-n-a na Nzambe azali te. Na ntango Mwana azali te, Polé ya moke, Lingomba, bandimi, basalelaka Nzambe mosala pe bapesaka Polé na ntango Mwana azali te. Kasi ntango moyi ebimi, okomona lisusu sanza te, mpamba te esili kokita. Ezali lisusu na ntina ya póle na yango te, mpo epesaka póle na yango mwa moke, eutelaka na moyi. Sikoyo, moyi ná sanza ezali lokola mobali ná mwasi, Lingomba ná Klisto.

³⁵ Sikoyo tomoni ete, makambo oyo ezali elilingi ya Klisto. Mbeka nyonso, fėti, pe makambo nyonso na Kondimana ya Kala, ezalaki elilingi ya Klisto; kaka ndenge elilingi ebetaka na nsé. Sikoyo awa nde epai wapi tokosengela komona esika oyo esengeli mpo na kosambela, ezali likambo ya kozonga awa na Kondimana ya Kala, esika oyo epesamaki mpo tómona soki makambo yango ezalaki nini.

³⁶ Sikoyo, soki elilingi moko emonani na nsé, okoki koyeba soki ezali mobali, mwasi, to nyama, to eloko soko nini mosusu, mpamba te elilingi na yango emonani na nsé. Pe ntango elilingi yango ekokóba kokóma moke, elilingi ezalaka negatif; pe negatif ekoki kozala te, kozanga positif. Na yango, ntango positif ezali kokóma pembeni ya negatif, negatif ezali komelama na kati ya positif. Soki elilingi ná—ná positif ekutani, yango nde esalaka ete ékóma positif, na ntango wana.

Pe soki “makambo nyonso ya kala,” ndenge Biblia elobi, “na Kondimana ya Kala, ezalaki bililingi ya makambo oyo ekoya,” boye yango wana, Klisto azalaki elilingi ya makambo oyo ekoya.

³⁷ Boye tokoki komona, na nzela ya bililingi ya Kondimana ya Kala, esika Aponaki kotia Nkombo na Ye, ko . . . mpo na sikoyo. Sikoyo, ntango elilingi ezali na . . . koleka na nse, ndenge nalobaki, ezali negatif, lokola etaliseli, na bongo biso, basámbeli, tokoki pe komona ndenge bililingi ya Kondimana ya Kala ezali kolimwa na kati ya positif ya oyo ya Sika.

³⁸ Sikoyo, bafėti nyonso, biyenga, mongombo mobimba, mabaya nyonso, nyonso oyo ezalaki na kati ya mongombo yango, nyonso ezalaki kotalisa Klisto. Mabonza nyonso, mibeko nyonso, makambo nyonso ezalaki kotalisa Klisto. Toyekolaki yango, mbala na mbala, awa na tabernacle.

Na bongo tomoni, na nzela na yango, ete bindimeli nyonso, mangomba, pe denomination etikali mosika mpenza na sima. Ezali ata kotángama te, ata moke te. Bindimeli nyonso,

mangomba nyonso, bibongiseli nyonso, etikali mpenza libanda. Esika moko mpo na makambo yango ezali ata moke te.

³⁹ Eloko moko te ezalaki etaliseli ya lingomba na Kondimana ya Kala, to esika moko boye na Biblia, longola kaka bomoko ya nko, ya ndako molai ya Babele. Yango nde eloko kaka moko oyo etalisi bomoko. Mpamba te, esalemaki na Nimerode, moto na nkanza oyo akendeki kosangisa na makasi bikólo nyonso ya mike, na makasi, ete básangana na esika moko na ndako ya molai oyo. Ezalaki losambo ya basámбели, na ntembe te, kasi Liloba ya Nzambe emonaki ntina na yango te. Boye kuna nde epai wapi bomoni etaliseli ya losambo ya denomination, ndako molai ya Babele, na Kondimana ya Kala. Oyo kutu, losambo oyo, na ntembe te, ezalaki losambo mpenza, kasi losambo ya Liloba na Nzambe te.

⁴⁰ Nzambe aponi kotia Nkombo na Ye kati na denomination moko te. Bólakisa ngai Likomi yango, soki ezali. Nayebi ete balobaka ete Atiá yango kati, kasi Atiá te. Akoki kotia Nkombo na Ye na bisika mingi te, mpamba te Alobaki ete Akotia Nkombo na Ye na esika bobele moko. Pe, esika moko yango, moko na moko ya ba-denomination na biso elingaka koloba ete bango nde bazali esika yango, kasi ezali bongo te.

Kasi esika nini Atiaki Nkombo na Ye?

⁴¹ Sikoyo, pe, Ye, ya liboso, Nkombo na Ye nani? Tokosengela (Nkombo) komona soki Nkombo ya Nzambe ezali nini, liboso tókoka koyeba eloko nini Azali kotia na esika yango.

Sikoyo, tomoni ete Azalaki na bibiangelo mingi. Abengamaka... Abengamaki “Tata,” oyo ezali ebiangelo. Pe Abengamaki “Mwana,” oyo ezali ebiangelo. Abengamaki “Molimo Mosantu,” oyo ezali ebiangelo. Abengamaki “Rose ya Sharon,” oyo ezali ebiangelo. “Lis ya Lobwaku,” ebiangelo, “Monzoto ya Ntongo.” “Jehovah-jiré, Jehovah-rafa,” ba-nkombo nsambo oyo ekeseni, ya kosangisa, ya lisiko, pe nyonso wana ezalaki bibiangelo. Ata moko te kati na yango ezalaki bankombo.

Kasi Azali na Nkombo.

⁴² Ntango Akutanaki na Mose, Azalaki naino na Nkombo te, pe Ayebisaki Mose: “NAZALI OYO NAZALI.” Pe ntango tomonaki Yesu na mokili, koloba na Baebele mokapo ya 6... Bólimbisa ngai, na Santu Yoane mokapo ya 6. Alobaki: “NAZALI OYO NAZALI.”

Balobaki: “Ee, Ozali Mobali oyo aleki naino mibu ntuku mitano te, kasi Olobi ete ‘Omóná Abraham’?”

⁴³ Alobaki: “Liboso ete Abraham ázala, NGAI NAZALI.” Pe “NGAI NAZALI” ezalaki Ye, nzete oyo ezalaki kopela móto, Likonzi na Móto oyo ezalaki na nzete oyo ezalaki kopela móto na mikolo ya Mose, “NAZALI OYO NAZALI.”

44 Pe sikoyo tomoni ete Yesu alobaki pe: “Nayaki na Nkombo ya Tata na Ngai, kasi boyambaki Ngai te.” Na bongo, Nkombo ya Tata esengeli kozala Yesu. Ya solo. Nkombo ya Tata ezali Yesu, mpo Yesu nde alobaki bongo. “Nazali komema Nkombo ya Tata na Ngai. Naye na Nkombo ya Tata na Ngai, kasi boyambi Ngai te.” Na bongo, Nkombo na Ye ezalaki Yesu.

Pe Gabriel abengaki Ye Yesu, basakoli babengaki Ye Yesu, pe Azalaki mpenza Yesu. Liboso ya mbotamá na Ye, ata mosakoli mosantu apesaki Ye Nkombo ya *Emanuele*, elingi koloba “Nzambe elongo ná biso.” Sima na yango, “Nzambe amonisamaki polele kati na nzoto, mpo na kolongola lisumu ya mokili,” pe, na kosaláká bongo, bapesaki Ye Nkombo ya Yesu. Boye, Yesu nde Nkombo yango.

Pe Nkombo yango etiamaki kati na Moto moko; na lingomba te, na denomination te, na endimeli te, kasi na Moto moko! Aponaki kotia Nkombo na Ye kati na Yesu Klisto. Sikoyo tomoni ete na ntango yango, Akómi esika ya kosambela ya Nzambe, epai wapi okosambela Ye.

45 Kala kútu liboso ete Ábotama, Nkombo na Ye ezalaki Yesu. Ezalaki mpenza na motuya, Mwanje Gabriel nde apesaki yango epai ya maman na Ye, ete Nkombo na Ye ekozala “Yesu, Mwana na Nzambe,” yango Ye azalaki.

46 Boye, wana nde tomoni yango. Ezali yango, kaka yango. Ezali, mpo na Ye moko, esika ya kosambela oyo Nzambe aponi. Esika ya Nzambe, aponaki. Nzambe aponaki kokutana na moto; ezalaki kati na lingomba te, kati na denomination te, kati na endimeli te, kasi kati na Klisto. Yango nde esika bobele moko oyo Nzambe akokutana na moto, pe ye akoki kosambela Nzambe, ezali kati na Klisto. Yango nde esika bobele moko. Ezali likambo te soki ozali Metodiste, Batiste, Katoliko, Protestant, ózala soko nani, esika ezali bobele moko oyo okoki kosambela Nzambe na ndenge esengeli, ezali nde kati na Klisto.

Baroma 8:1, elobi: “Yango wana, sasaipi kokweisama ezali te mpo na baoyo bazali kati na Klisto Yesu, baoyo bazali kotambola kokokana na nzoto te, kasi kokokana na Molimo.” Yango nde Nsango-malamu.

47 Tokoki kokesana na bindimeli. Tokoki kokesana na bandidibola ya bato. Okoki kosambela na lingomba Metodiste, ekosengela ozala Metodiste; Batiste, Batiste; Katoliko, Katoliko. Kasi soki osili kobatisama na kati ya Klisto, pe okómi enama ya Nzoto na Ye, bokeseni ezali lisusu te. Bitutu ya bokabwani esili kobukana pe osili kozua bonsomi, mpo okoti kati na Klisto Yesu. Pe okosambela Nzambe na Molimo pe na Solo, ntango ozali kati na Klisto Yesu. Ezali mwango ya Nzambe mpo na yo kosambela Ye kati na Klisto Yesu.

48 Sikoyo, denomination ya lingomba moko te ekoki koloba boye, moto moko te akoki koloba bongo. Ndenge nini ókomeka

kosala makambo ya ndenge wana? Kosala likambo ya ndenge wana ekozala molimo ya motemeli-na-Klisto, kolongola na Klisto; kolongola yango Ye. Okoki kosala bongo te. Klisto azali esika bobele moko oyo Nzambe akutanaka na basámbeli.

⁴⁹ Lelo, balobaka. Bato balobá na ngai bongo. Mobali moko abengaki ngai, kala mingi te, na Beaumont, na Texas. Alobaki: “Mr. Branham, soki nkombo na yo ekomami na buku ya lingomba na biso te, okoki kokende na Lola te.” Bokoki mpenza kokanisa likambo ya ndenge wana? Bóndima likambo ya ndenge wana te. Bakanisaka ete bosengeli kozala moto ya lingomba songolo wana, soki te, bokoki kokende na Lola te. Ezali libunga. Kondima yango, ezali kotelemela Klisto. Nalobi boye: Soki ondimi molimo ya ndenge wana, obungi. Wana ezali elembi malamumu kotalisa ete obungi, mpamba te ezali kolongola na oyo Nzambe asalaki. Nzambe atikálá kotia Nkombo na Ye kati na lingomba moko te. Atiaki Yango kati na Mwana na Ye, Klisto Yesu, ntango Ye ná Mwana na Ye bakómaki Moko. Yango nde esika ya kosambela ya solosolo. Mobóko mosusu etiamaki te, libanga mosusu te.

Natelemi likolo na Klisto, Libanga ya bileko;
Mabelé mosusu nyonso ezali zelo ya kozindisa.

Ba-denomination ekobukana pe ekokweya, bikólo ekoleka, kasi Ye akotikala libela. Moto akoki komona esika mosusu te, mpo na kosambela Nzambe, epai wapi Nzambe akozongisela ye eyano, esika mosusu te, bobele kati na Klisto Yesu. Yango nde esika bobele moko, esika bobele moko oyo Nzambe aponaki mpo na kotia Nkombo na Ye, pe esika bobele moko oyo Akutanaka na moto, mpo na kosambela. Soki ondimi eloko mosusu, obungi.

⁵⁰ Bótala, baféti nsambo nyonso ya Bayuda ezalaki kosalema na esika bobele moko. Bazalaki kosala féti moko *awa* te mpo na ba-Metodiste, bongo mosusu *awa* mpo na ba-Batiste, moko *kuna* mpo na ba-Presbiterien, mosusu *awa* mpo na ba-Katoliko, pe mosusu mpo na ba-Protestant. Baféti nsambo nyonso ezalaki kosalema na esika bobele moko.

⁵¹ Ezali etaliseli moko ya kitoko awa. Touti koyekola Bileko Nsambo ya Lingomba, mpo na kotalisa ete Nzambe abatelaka Bileko Nsambo ya Lingomba nyonso na kati ya Liloba, mpo eleko ya lingomba moko moko ezalaki kotalisa eteni moko ya Liloba, pe ntango nyonso bazalaki kotalisa yango, bazalaki komona Polé.

Kaka lokola bato ya liboso oyo bamonaki libatizi na Nkombo na Yesu. Basalaki nini? Bakómisaki yango denomination, pe ekufaki be mpenza wana. Na bongo Nzambe akendeki semba kokota na moto mosusu. Akotikala kati na moko na bindimeli pe biyambweli wana te. Azalaka na eloko ya kosala na yango te. Na Nzambe, eloko ebéba ezali te. Liloba na Nzambe ezali

búlee, esangísámá te. Klisto azali esika ya kati-kati mpenza ya kosambela Nzambe. Azali Nzambe.

⁵² Baféti nyonso nsambo esengelaki kosalema na esika moko wana. Bakokaki kosala féti na esika mosusu te. Kasi baféti yango nsambo, esika . . . Baféti nsambo ya mobu esengelaki kosalema na esika kaka moko. Na boye, Bileko Nsambo ya Lingomba esengelaki kouta na esika kaka moko, wana ezalaki Klisto koloba na Bileko nyonso Nsambo ya Lingomba. Ezali mpenza bongo. Etaliseli, ya Bileko Nsambo ya Lingomba, kasi bakómisi yango denomination.

⁵³ Sikoyo tótala etaliseli mosusu wana tokómi awa, ezali, etaliseli ya pásika, ezalaki elilingi ya Yesu. Awa tomoni mbeka ya makila, na nzela ya liwa. Mbeka ya makila ezalaki esika oyo ezalaki elilingi ya Klisto. Denomination ekoki nde kotangisa makila; bokoki kokanisa ete lingomba étangisa makila, denomination étangisa makila? Ata moke te. Esengaki makila, kotangisa makila longwa na bomoi moko. Pe, bomoi yango, awa Yesu atalisami na nzela ya mwana-mpate. Mwana-mpate azalaki etaliseli ya Klisto, pe azalaki elilingi kotalisa Klisto, mpo Azalaki “Mwana-mpate ya Nzambe,” oyo Yoane atalisaki, “oyo alongolaka lisumu ya mokili.” Tomoni Yesu kotalisama, awa na Esode mokapo ya 12.

⁵⁴ Bótala, ezalaki esika kaka moko oyo liwa ekokaki kobeta te. Ntango liwa elingaki kobeta mboka, esengelaki kozala na esika moko boye; baoyo nyonso bazalaki na nsé na yango te bakufaki. Esika bobele moko! Sikoyo, elingaki koloba te ete ezalaki ndako moko; kasi ezalaki na esika moko, wana nde esika oyo mwana-mpate azalaki kobobama. Na esika oyo makila ya mwana-mpate ezalaki, mwanje ya liwa akokaki kobeta te, mpamba te ezalaki esika bobele moko oyo Nzambe atiaki Nkombo na Ye. Pe mwana-mpate yango elobamaki kuna na ebandeli, mwana-mpate. Bótala, ezalaki esika bobele moko oyo akokaki kobeta te.

⁵⁵ Sikoyo ezali pe bongo lelo. ezali na esika bobele moko, oyo liwa ya molimo ekoki kobeta te, ezali Liloba. Kufa ekoki kobeta Liloba te, mpo Ezali Liloba na Nzambe na bomoi.

Kasi soki osangisi bindimeli ná Yango, Liloba ebimaka pe etikalaka Yango moko. Ekokabwana ndenge mayi ekabwanaka ná mafuta. Okoki kosangisa yango elongo te. Yango wana, bomoni, ntango endimeli ekotaka na denomination, bango nyonso balandaka endimeli yango; pe Liloba elimwaka, pe ekóbaka ná moto mosusu pe akólisaka Yango koleka. Ezuaka mpiko, wana Ekendeke longwa na kolongisama, kobulisama, libatisi ya Molimo Mosantu, pe kobima pe kokota na kati ya Mbuma! Bomoni nzela oyo Nzambe alandaki? Azalaki komema Nkombo na Ye, ntango nyonso, mpenza na lolenge moko, mpo Ye azali Liloba.

Bótala, Ekoki kokufa te. Liloba ya Bomoi ekoki kokufa te.

⁵⁶ Bótala ndenge ebongi be, sikoyo. Epekisamaki te na mwanje na liwa kobeta libota monene ya mayele ya Ezipito. Epekisamaki te kobeta mabelé na yango ya búlee, bandako na yango ya minene, bafálo na yango. To, banganganzambe ya mboka yango, mwanje yango apekisamaki te mpo na kobeta. Ekokaki kobeta ndako nyonso, esika nyonso, moto nyonso, kasi ekokaki kobeta te esika mwana-mpate azalaki.

Kufa ekoki kobeta te esika oyo ebongisami na Nzambe, pe yango ezalaka kati na Mwana-mpate.

⁵⁷ Bótala, ata kutu te. . . epekisamaki na ye kobeta Yisalaele to banganganzambe na yango ya Baebele, pe, to ba-denomination na bango nyonso. Bato nyonso basengeli kozala na esika oyo Nzambe aponi, abongísi, soki te, liwa ezalaki kobeta.

⁵⁸ Lingomba, ózala wapi, ózala moto ya soko losambo nini, esalaka bokeseni moko te mpo na ngai. Kasi, ezali na eloko moko oyo osengeli koyeba, osengeli kozala kati na Klisto, soki te, osili kokufa. Okoki kozala na bomoi te libanda na Ye. Lingomba na bino ekoki kozala na yango malamú, lokola ndako; bondeko na bino ekoki kozala na yango malamú, lokola bato. Kasi soki oboyi Nzoto, Makila, Liloba na Yesu Klisto, okufi na miníti oyo osali yango. Ezali esika ya kosambela oyo Nzambe aponi. Na esika yango nde Nkombo na Ye ezali, mpenza. Wana nde esika Aponaki kotia Nkombo na Ye; na lingomba te, kasi na Mwana, Yesu Klisto.

⁵⁹ Bótala, kobatelama ezalaki kaka na esika Ye aponi, kati na mwana-mpate na Ye, pe na nkombo ya mwana-mpate.

⁶⁰ Bótala, ezalaki mwana-mpate “mobali,” ya mobali, ya mwasi te. Lingomba te, ye mwasi; kasi Nkombo na Ye mobali, na nkombo na ye mwasi te. Esika Alingaki kokutana na bato, ezalaki na nkombo ya mwasi te, kasi na Nkombo na Ye, Mobali, Mwana-mpate!

⁶¹ Sikoyo tolobaka: “Lingomba, lingomba monene, ya nguya, esalaki *oyo* pe esalaki *oyo wana*. Eleká na mipepe ya makasi. Tosili kokóma na bato ebele. Tozali na motango ebele ya bato. Tozali lingomba moko ya nguya. Mwasi yango azali na motuya monene.”

Kasi Nzambe atikálá koloba eloko moko te na ntina na ye mwasi. Alobaki “Ye mobali.” “Ye mobali” nde esika ya kokutana, Mwana-mpate, lingomba te. Nkombo ya ye mwasi te, kasi Nkombo ya Ye mobali. Atiaki nkombo na ye mwasi esika moko te. Atiaki Nkombo na Ye kati na “Ye mobali”!

Yango wana: “Nyonso oyo tosengeli kosala, na maloba to na misala, tosengeli kosala yango na Nkombo na Yesu Klisto.” Soki tokobondela, tosengeli kobondela na Nkombo na Yesu. Soki tokosenga eloko moko, tosengeli kosenga yango na Nkombo na Yesu. Soki tokotambola, tokotambola na Nkombo na Yesu. Soki tokoloba, tóloba na Nkombo na Yesu. Soki tokobatisa, tosengeli

kobatisa na Nkombo na Yesu Klisto. Mpamba te: “Nyonyo oyo tokosala na maloba to na misala, bósala yango na Nkombo na Yesu Klisto.”

⁶² Mobali moko alobaki na ngai mokolo moko, tozalaki kosolola likambo yango, alobaki: “Ndeko Branham, mwasi na ngai, ngai na . . .” Alobaki: “Ye, nkombo na ye *Songolopakala*.” Ye mobali yango azali motei, akoki kozala awa na ngonga oyo. Alobaki: “Mwasi na ngai,” alobaki, “azuá nkombo na ngai.” Nakobenga ye kaka *Jones*, mpo ezalaki Jones te. Alobaki: “Sikoyo, azali na ntina te ya kolamuka ntango nyonso na ntongo, kozua kómbo pe koloba: ‘Sikoyo nazokómba na nkombo ya Jones, nazosukola basani na nkombo ya Jones, pe nazobamba bilamba na nkombo ya Jones.’” Alobaki: “Nandimi te ete osengeli ntango nyonso kotánga nkombo.”

Nalobaki: “Ngai nandimaka ete osengeli kosala yango.” Ya solo.

Pe alobaki: “Ee, mpo na nini? Mwasi na ngai azali na ntina ya koloba yango te. Nyonso oyo ye asalaka, ezalaka na nkombo ya Jones, mpo na kobanda.”

⁶³ Nalobaki: “Kasi otambolaki te na balabala moko bongo ozuaki ye, pe olobaki: ‘Yaka, Jones.’ Asengelaki liboso kokóma ‘Jones’, na nzela ya molúlú moko, molúlú ya libala. Soki te, bozali kobika kati na ekóbo. Pe soki obatisami ndenge mosusu, libanda na Nkombo na Yesu Klisto, ezali libatisi ya ekóbo, oyo ezuami kati na Biblia te.”

Na bongo, “Oyo bokosala na maloba pe na misala, bósala nyonso wana na Nkombo na Yesu.” Kolandana na oyo wana, nde bokosala! Kasi liboso, okómi na Nkombo na Ye.

⁶⁴ Basi malamau bazali mingi na ndako oyo na mpokwa oyo, basi malamau, ya sembo; kasi Madame William Branham azali kaka moko. Ye nde oyo azongaka na ndako elongo ná ngai. Ye nde oyo azali mwasi na ngai.

⁶⁵ Bato malamau bazali na mokili, mangomba ya malamau; kasi Madame Yesu Klisto azali moko, pe ye nde oyo Ye azali koyela. Kuna nde esika oyo Nkombo na Ye efandi. Kuna nde epai wapi kosambela Ye ezali, kati na Ye mwasi pe bobele Ye mwasi. Ezali solo. Oh, iyo mesie. Tomoni ete yango ezali solo.

⁶⁶ Sikoyo, yango wana, biso, “Nyonso tosalaka na maloba to na misala, tosalaka yango na Nkombo na Yesu Klisto.”

“Ezali na nkombo mosusu te oyo epésámí na nsé ya Lola mpo na lobiko, bobele Nkombo ya Yesu Klisto.” Misala, mokapo ya 2, elobi ete: “Mpo, tika ete eyébana na bino . . .” “Nkombo mosusu epesami te na nsé ya Lola, oyo moto asengeli kobikisama na nzela na yango, bobele na Nkombo na Yesu Klisto.” Amen. Nabanzi bososoli yango. Nkombo na Yesu Klisto, nyonso . . .

Likolo oyo eleki Likolo ebengami na nkombo na Ye, “Libota mobimba na Lola, ebengami na nkombo na Yesu,” Biblia elobi, “pe mabota nyonso na nsé, epesami nkombo na Yesu.” Boye yango nde Nkombo Nzambe aponi pe esika Asili kotia Yango. Yango nde esika na Ye ya kosambela, ezali kati na Yesu Klisto. Sikoyo, toyebi ete ezali bongo, esika mosusu ya kosambela ezali te, bobele kati na Ye.

⁶⁷ “Nkombo mosusu ezali te na nsé na Lola, oyo epesami na kati ya bato, ete basengeli kobika na nzela na yango.” Ya Ye ezali Nkombo ya Nzambe mpo na lisiko. Nzambe azali na nkombo babengi Jehovah-jiré, Jehovah-rafa. *Jehovah-jiré*, “Nkolo alimbisaka masumu na yo nyonso.” *Jehovah-rafa*, “Nkolo abikisaka bokono na yo nyonso.” Azalaki na bibiangelo mingi. Kasi Azali kaka na Nkombo moko ya lisiko, oyo ezali ya bato, pe ezali Nkombo na “Yesu.” Yango nde Nkombo na Ye, oyo Aponaki kotia. Atiaki Yango wapi? Atiaki Yango kati na Klisto.

⁶⁸ Bankombo mosusu nyonso ya mangomba, bindimeli, bibiangelo, ezali liwa, soki otieli yango motema. Soki otieli lingomba Metodiste motema mpo émema yo na Lola, osili kobunga. Soki otieli ba-Pantekotiste motema, lingomba Pantekotiste mpo émema yo na Lola, osili kobunga. Pe ba-Batiste, ba-Lutherien, ba-Presbitérien, ba-Katoliko, lingomba mosusu nyonso; soki otieli nkombo na bango motema, to ebiangelo na bango, to endimeli na bango, osili kobunga.

Mpamba te, okoki ata kosambela te, soki okoti liboso na esika yango ya kosambela te. Amen. Yango nde esika bobele moko oyo Nzambe akutanaka na mosámбели, ezali esika oyo Aponá kotia Nkombo na Ye. Nyonso mosusu, soki otieli yango motema, okokufa. Ye pe . . .

⁶⁹ Elilingi mosusu ya Yesu awa, nakomaki, Likomi yango. Lisusu, A—Atalisaki elilingi oyo ete: “Asengeli kozanga mbeba.” Esika oyo Atii Nkombo na Ye, mwana-mpate oyo esengeli kozala na mbeba te.

Sikoyo, denomination to sisteme nini oyo bokoki kolakisa likambo oyo na likambo yango; lingomba nini, Katoliko, Protestant, Bayuda, ézala lingomba nini? Sisteme nini, denomination nini bokoki kolakisa yango na likambo yango, “oyo ezangi mbeba”? Yango nyonso ebwakami, pe eboyami!

Kasi esika moko ezali! Aleluya! Esika yango ezali kati na Yesu Klisto. Mbeba ezali te epai na Ye. Libunga moko te ezali kati na Ye.

Bokoki kolakisa likambo oyo te. Bato nyonso oyo bamekaka kosala bongo, balobaka ete lingomba na bango ezangi libunga pe nyonso *oyo*. Ezali babúki-Liloba ya mbindo, balingi ya Laodikia, bakufá ndambo, endimeli, kasi ezali Solo te. Kasi ata Pilate ye moko, moyini na Ye, alobaki: “Namoni libunga moko te kati na

Ye.” Moyini na Ye moko mpenza atatulaki ete Azalaki na libunga moko te kati na Ye. Bokoki kotángela Ye lisumu ata moko te.

⁷⁰ Alobaki na banganzambe ya mikolo na Ye: “Nani kati na bino akoki kokweisa Ngai na ntina na lisumu? Nani akoki kolakisa Ngai ete Nazali mosumuki?”

Bóyebisa ngai lingomba moko oyo ekoki koloba ete basálá naino mabe ata moko te. Na bosolo mpenza, ezali na moko te kati na bango, ya koluka mpenza, oyo ezángá koboma bato pe kosala makambo nyonso oyo ekomami na mikanda ya kala, mpenza. Ata bongo bazali kokoba komibenga. . . Na bongo ezali esika ya kokutana na Nzambe te mpo na kosambela, na endimeli to denomination moko.

⁷¹ Banninga na ngai, nalingi koyokisa bino mpasi te, kasi nazali na mokumba ya Nsango moko, pe, Nsango yango ezali: “Bóbima na mbindo oyo!” Pe soki nasengi bino ete bóbima, nakomema bino wapi? Nakomema bino na Branham Tabernacle? Yango pe ezali na libunga lokola baoyo nyonso etikali.

Kasi ezali na esika moko oyo nakoki komema bino, epai wapi bokozala na kimia pe bokobatelama na liwa, ezali kati na Yesu Klisto nde, esika ya kosambela ya Nzambe. Yango nde esika oyo nazali kotalisa bino, na mpokwa oyo, epai wapi Nzambe atíá Nkombo na Ye. Epai wapi Alakaki ete Akokutana na moto nyonso oyo akokota kuna, Akosambela elongo ná ye pe akosala fėti elongo ná ye, yango ezali kati na Klisto; kati na lingomba moko te, kati na tabernacle moko te.

Kasi, kati na Klisto, Ye azali Tabernacle na Nzambe. Ye azali esika oyo Nzambe akotaki, Ye moko, pe afandaki kati na Ye. “Oyo azali Mwana na Ngai ya bolingo, oyo Nasepeli kofanda kati na Ye.” Kuna nde epai wapi Nzambe afandaki, amemaki Nkombo na Ye pe atiaki Yango likolo na Yesu Klisto. Yango wana, Nkombo na Ye etiamaki kati na Moto moko, Mwana na Ye, Yesu Klisto, kati na Ye nde Ye moko amifandisaki, pe kati na Mongombo wana.

Nzokande, na etaliseli, Yelusaleme ya kala, bafėti ya kala, tempelo ya kala, ezalaki etaliseli; ntango mólinga ekotaki kuna, mokolo oyo sanduku ya boyokani ekotaki kuna, pe efandisamaki, pe Mongongo na Nzambe eyokanaki uta na yango.

Ndenge moko pe, Mongongo na Nzambe eyokanaki, ntango ekotaki na Tabernacle yango, Yesu Klisto; elingi koloba, ya Kala (ya mokili) ezalaki etaliseli pe elilingi ya oyo ya Sika. Pe ntango Akotaki na kati ya Klisto, Alobaki: “Oyo azali Mwana na Ngai ya bolingo, oyo Nasepeli kofanda kati na Ye. Pe Nakopona esika oyo Nakotia Nkombo na Ngai, epai wapi Nakokutana na moto, pe epai wapi Nakosambela.” Nzambe aponaki esika yango; na denomination ya lingomba moko te, kasi kati na Yesu Klisto. Iyo mesie.

⁷² Asengeli pe kozala “na mbeba moko te,” ndenge nalobaki. Denomination moko te ekoki koloba ete ezangi yango. Bazali na yango; bazali batemeli-Klisto.

⁷³ Sikoyo tomoni awa, bótala elilingi na Ye lisusu. Mwa—mwana-mpate yango, asengeli kobatelama. Sikoyo, oyo ekomami na Esode 12, soki bozali kokoma yango, Esode 12:3 kino 6. Mwana-mpate yango, asengeli kobatelama mikolo minei, mpo émekama, kotala soki ebongi kaka mpo na kopesama mbeka. Esengeli kozua yango, kotala yango malamumu mbala na mbala, mikolo minei, kotala soki ezali na mbeba moko, kotala soki ezali na bokono moko, koyeba soki eloko moko ezali malamumu te ná yango. Esengeli kobatelama mikolo minei.

⁷⁴ Sikoyo bótala. Bamosusu kati na bino ntango mosusu bakanisaki ete oyo wana ezalaki mwa moke, ete bazalaki koboma yango na mokolo ya zomi na minei. Kasi, bomikanisela, bazalaki kozua mwana-mpate yango na mokolo ya zomi ya sanza, pe koboma yango na mokolo ya zomi na minei ya sanza, bomoni, elingi koloba ete ezalaki kobatelama mpo na mikolo minei.

⁷⁵ Sikoyo, Yesu, Nkombo ya Nzambe, Mwana-mpate, akotaki na Yelusaleme pe atikala kobima lisusu te, kino sima na liwa, bokundami, pe lisekwa na Ye. Abatelamaki mpo báluka komona mbeba mói minei pe butu minei. Mwana-mpate yango atalisamaki na ndenge ebongi be, abatelamaki mikolo minei. Na ntango yango nde Pilate alobaki: “Namoni libunga moko te kati na Ye.”

⁷⁶ Elilingi na Ye mosusu, mokuwa na Ye moko te ekokaki kobukana, yango etikalaki mpenza bongo, bakokaki te. Ntango bazalaki koboma mbeka, bakokaki kobuka mokuwa te. Soki ebukani, yango ezalaki koboyama. Pe basilaki kotombola martó mpo na kobuka mikuwa ya makolo na Klisto, pe balobaki: “Asili kokufa.” Batobolaki mopanzi na Ye pe bamonaki Makila ná mayi.

⁷⁷ Bótala lisusu likambo mosusu ya motuya awa. Nalingi kotika yango pembeni te, mpamba te Atalisamaki na ba-mbeka, na mbeka ya faríni.

Nazomikanisela ete kalakala, bazalaki na eteyelo moko, na Biblia, ebengamaki eteyelo ya basakoli, pe ezalaki solo mpenza eteyelo. Pe tomoni ete Eliya akendekei kuna, na eteyelo yango, mokolo moko, pe balobaki: “Biso . . .” Babondelaki ye ete ákende, balobaki: “Ntango ozalaka awa, makambo etambolaka na molongo mingi.” Boye balingaki ete ákende na ye.

Pe bakendekei kolukela ye bilei ya mpokwa. Etonga moko ya banganzambe babimaki, to basakoli, mpo na kobúka madesu ya mike, mpo bálambela ye bilei. Ntango bakendekei kosala yango, bakongolaki ebele pe batondisaki elamba ná yango; ntango bazongaki, ezalaki mbuma ya zamba, oyo ezalaki

mbondó, pe babwakaki yango na kati ya nzungu. Nzungu yango ebandaki kotoka, pe bango, moto moko alobaki: “Mawa, liwa ezali na kati ya nzungu. Sikoyo tokoki ata kolia te.”

Pe Eliya alobaki: “Bóyéla ngai mwa faríni na loboko.” Pe azuaki faríni yango, abwakaki yango na kati ya nzungu, pe alobaki: “Bólia. Nzungu ebiki.”

⁷⁸ Mbeka ya faríni yango ezalaki Klisto. Mbuma nyonso esengelaki kozala ndenge moko, pe eteni moke nyonso ya faríni basengelaki konika yango ndenge moko, mpo na mbeka ya faríni. Kolakisa ete Ye azali Mobikisi bokono. Ye alongolaka pe azuaka esika ya liwa, pe Atiaka Bomoi; na nzela ya mibeko mibale wana. Aleluya! Esika liwa ezali, esika moko; ntango Klisto akotaka, Bomoi ekotaka. Azali ndenge moko lobi, lelo, pe libela. Pe esika oyo liwa ezalaki, Bomoi ekomaki wana, mpamba te Klisto akotisamaki kuna, mbeka ya faríni.

⁷⁹ Makambo oyo ekozala mpenza mateya minene, soki tozui ntango ya koyekola yango na bozindo! Sikoyo bótala, liloba moko te ya bililingi yango ekweiyaka. Liloba moko te, ya elilingi yango, etikálá kokwéyá. Nyonso etaliselami na ndenge ebongi be.

Azali esika ya kosambela oyo Nzambe aponi, pe Nkombo ya Nzambe epesameli Ye. Azali esika ya kosambela ya Nzambe, pe Nkombo ya Nzambe epesameli Ye. Azali Liloba na Nzambe, pe Azali Nkombo na Nzambe. Azali Liloba ya Nzambe pe Nkombo na Nzambe, nyonso mibale. “Azalaki Liloba oyo ekómi nzoto.” Azalaki Liloba na Nzambe, Mwana-mpate na Nzambe, Nkombo na Nzambe, pe Azalaki Nzambe. Yango nde oyo Azalaki, esika bobele moko oyo eponami ya kosambela epayi ya Nzambe.

⁸⁰ Pe Nzambe aboyaka bisika mosusu nyonso libanda na Yesu Klisto; okoki kosambela Ye esika mosusu te. Alobaki: “Bazali kosambela Ngai mpamba, kolakisáká Mateyo oyo ezali mibeko ya bato.” Lelo tozali na bindimeli, biyambweli, pe nyonso wana, oyo eteyaka ete *oyo* nde nzela pe likambo *oyo wana* nde nzela.

Pe Yesu alobaki: “Nazali Nzela, Solo, pe Bomoi, moto moko te akoki koya epai na Nzambe, soki aleki epai na Ngai te.” Na elobeli mosusu: “Nazali Ekuke ya lopango ya bampate. Baoyo nyonso ya libanda bazali miyibi.” Ye azali ekoteli moko yango. Azali Ekuke. Azali Nzela, Solo, Bomoi, nde nyonso oyo ezali; ekoteli bobele moko, esika bobele moko, kosambela bobele moko, Nkombo bobele moko.

Nyonso ekangani na Yesu Klisto. Kondimana ya Kala mobimba ekangani na Ye. Kondimana ya Sika ekangani na Ye. Pe Lingomba, lelo, ekangani na Ye, na nzela na Liloba ya mobeko na Ye. Esika mosusu ezali te, to Nkombo mosusu, to esika moko te, epai wapi Nzambe alakaki ete Akokutana na moto; bobele kati na Yesu Klisto, esika ya kosambela oyo Ye aponi.

⁸¹ Bótala, Nzambe alakaki ete Akokutana na basámbeli na Ye bobele na esika moko oyo, pe wana ezali kopona oyo ya Ye Moko; ezali kopona na biso te, ya makanisi na biso te; kasi ya makanisi na Ye, kopona na Ye. Pe ekozala esika oyo Akotia Nkombo na Ye, esika oyo Aponaki. Boye tososoli ete tomoni esika oyo Nkombo na Ye ezalaki, oyo Ye aponaki, na kopona na Ye moko.

⁸² Sikoyo lokola tomoni esika oyo Atiaki Nkombo na Ye, elingi koloba, kati na Yesu Klisto, pe esika mosusu ezali te, to nkombo mosusu te, bosepeli na yango? Bóloba: “Amen.” [Losambo balobi: “Amen.”—N.D.E.] Sikoyo, likambo ezali ete, esiki tomoni esika yango ezali. . . Esika ya kosambela endimami epai moko te, bobele kati na Klisto.

Okoki kobongola motema, okoki kosala yango, kasi naino obandi kosambela te. Ozali nde kosenga bolimbisi. Petelo alobaki. . .

Na Mokolo ya Pantekote, ntango bamonaki bango nyonso koloba minoko na sika, ná bilembo ya minene pe bikamwa oyo ezalaki kosalema, Babandaki koseka, lingomba ebandaki koseka, pe elobaki: “Bato oyo basili kotonda na vinyo ya sika. Bazali kosala lokola bato balángwe masanga. E. . .” Mongondo Maria, bango nyonso, bazalaki elongo, bato mokama na ntuku mibale. Bazalaki kotenga-tenga lokola bato balángwe masanga, koloba minoko na sika, pe kosala makambo ya ndenge wana. Balobaki: “Bato oyo basili kotonda na vinyo ya sika.”

⁸³ Kasi Petelo, atelemaki, alobaki: “Bandeko, bato oyo balángwe vinyo ya sika te, mpo oyo ezali naino ngonga ya misato ya mokolo. Kasi oyo ezali likambo elobamaki na mosakoli Yowele ete: ‘Ekosalema na mikolo ya suka, elobi Nzambe, Nakosopa Molimo na Ngai likolo ya nzoto nyonso; bana na bino ya mibali pe ya basi bakosakola; Nakosopa Molimo na Ngai likolo ya basali na Ngai ya basi pe mosali na Ngai ya mwasi. Nakolakisa bilembo na likolo, pe na mokili; móto, makonzi na móto, londéndé ya mólinga. Ekosalema ete, liboso Mokolo monene pe ya nsómo ya Nkolo éya, ete moto nyonso oyo akobelela Nkombo ya Nkolo akobika.’”

⁸⁴ Ntango bayokaki bongo, mitema na bango ezokaki, pe balobaki: “Mibali pe bandeko, tósala nini?”

⁸⁵ Petelo alobaki: “Bóbongola mitema, moko na moko na bino, pe bóbatisama na Nkombo na Yesu Klisto mpo na bolimbisi ya masumu na bino, pe bokozua likabo ya Molimo Mosantu. Mpamba te elaka yango ezali mpo na mabota nyonso oyo ekolanda.” Sikoyo tomoni yango.

⁸⁶ Sikoyo tolingi komona ndenge bakotaka *kati na Ye*. Ndenge nini bakotaka na esika ya kosambela yango? Bakorinti ya Liboso 12 ekati likambo yango, mpamba te: “Na Molimo moko!” Na lingomba moko te, na endimeli moko te, na mokengeli moko te, na epísikópo moko te, na nganganzambe moko te. Kasi:

“Na Molimo Mosantu moko nde biso nyonso tobatisami kati na Nzoto moko,” oyo ezali Nzoto na Yesu Klisto, pe tokoki kozua makabo nyonso oyo ezali kati na Nzoto yango. Iyo mesie! Ezali na boyingeli te, na bozongeli na koloba bindimeli te, na kofúla te, komikwéyisa te, na mbote ya loboko te, to na eloko mosusu te. Kasi, na nzela ya Mbotama nde tobatisami kati na Nzoto ya Yesu Klisto! Amen. “Na nzela ya Molimo Mosantu moko nde biso nyonso tobatisami kati na Nzoto moko.”

⁸⁷ Pe Nzoto yango ezali nini? “Na ebandeli Liloba azalaki, Liloba azalaki elongo ná Nzambe, pe Liloba azalaki Nzambe. Pe Liloba akómaki nzoto pe afandaki elongo na biso.” Ndenge nini tokoki kozala kati na Nzoto yango pe kowangana Liloba moko na Yango, to kotia Yango na esika mosusu na lolenge ete Ezali ata kati na Nzoto te? Ndenge nini tokoki kosala yango? Esika oyo Nzambe aponi!

⁸⁸ Bótala, pe soki obatisami mpenza kati na Ye, ndangá ya solosolo ezali ete ondimi Ye, Liloba.

Ndenge nini okoki kozala eteni na Ye pe koboya Ye? Ndenge nini nakoki kowangana loboko na ngai, ete ezali loboko na ngai te? Soki e. . . Soki nasali bongo, eloko moko ezali kotambola malamú te na bongó na ngai. Pe ndenge nini nakoki kosala yango? Soki eloko moko ezali kotambola malamú te na bongó na ngai, mpo náwangana loboko na ngai, mpo náwangana lokolo na ngai, eloko moko ezali kotambola malamú te na molimo ya mondimi oyo awangani Liloba moko, oyo Nzambe alobaki to alakaki. Eloko moko ezali kotambola malamú te na molimo ya mondimi ya maloba wana.

⁸⁹ Okoki kowangana likomá na Ye ata moko te, mpamba te osili kokóma eteni na yango. Ozali eteni na Ye mpo osili kobatisama kati na Ye; na nzela ya, Molimo Mosantu nde esili kokótisa yo kati na Nzoto ya Yesu Klisto. Oyo mpenza Likambo moko kitoko!

⁹⁰ Nzambe azalaki na esika moko boye oyo Akutanaki—Akutanaki na Abraham, pe kuna nde Abraham azalaki kosambela. Na kati ya Kondimana mobimba!

Pe Liloba na Ye oyo elakamaki ekolimbolama kati na yo, na nzela na Ye. Bososoli yango? Liloba oyo Alakaki kokokisa yango na eleko oyo ozali kobika kati na yango: okokóma mokanda ekomami na Nzambe, etangami na bato nyonso. Ezali te oyo yo olobi, kasi oyo Nzambe azosala na nzela na yo, nde ekoloba makasi koleka nyonso oyo okokaki koloba. Nzambe alobaki: “Bilembo oyo ekolanda baoyo bakondima.” Yango nde ezoloba na nzela na yo.

⁹¹ Alobelaki eleko oyo, makambo oyo ekosalema sikoyo. Bandimi ya eleko oyo basengeli kondima likambo Oyo, oyo Ye alakaki lelo. Kaka ndenge bato basengelaki kokota na masuwa, mpo na kobikisama; kobima na Ezipito mpo na kobikisama;

basengeli kokota kati na Klisto, mpo na kobikisama lelo, kati na Nsango Liloba, ete Azali ndenge moko lobi, lelo, pe libela.

⁹² Ndenge nini bakotaka kati na Yango? Na nzela ya libatisi! Libatisi ya nini, ya mayi? Na nzela ya Molimo Mosantu! “Na Molimo moko, biso nyonso tobatisami kati na Nzoto moko oyo.”

⁹³ Pe Liloba ya elaka na Ye, ezali te ete Ako. . . Bokozala na ntina ya kolimbola Yango te. Ye akolimbola Yango na nzela na bino; oyo bozali kosala, oyo Ye alakaki kosala. Lingomba oyo elandaka Ye ekokóma mpenza lokola Ye na lolenge ete bato bakoyeba.

Bótala Petelo ná Yoane, ntango batunaki bango mituna mpo babikisaki mobali moko na ekuke oyo babengi Kitoko. Balobaki: “Bato bamonaki,” banganganzambe wana, “ete bazalaki bayínga pe batángá te,” kasi basosolaki ete bazaláká elongo ná Yesu. Mpamba te, (nini?) bazalaki kosala makambo oyo Ye asalaki.

⁹⁴ Asengelaki kosala misala ya Tata. Pe lelo, esengeli kozala ndenge moko.

⁹⁵ Sikoyo, bómikanisela, Azali ndenge moko lobi, lelo, pe libela; mpo Nzambe akutanaka na yo kati na Ye, esika kaka moko oyo ezali; mpo nde epai wapi asili kopona mpo na kotia Nkombo na Ye, kati na Yesu. “Yesu” ezali Nkombo ya Nzambe. Bóbosana te, Tata, Mwana, Molimo Mosantu, ezali bibiangelo ya Nkombo na “Yesu Klisto.”

⁹⁶ Ntango Matai alobaki: “Boye, bókende kozalisa bayekoli na mabota nyonso, bóbatisa bango na Nkombo ya Tata, ya Mwana, pe ya Molimo Mosantu.”

Ndenge mpenza elimbolami mabe lelo, pe bazali koloba: “Na nkombo ya Tata, nkombo ya Mwana, nkombo ya Molimo Mosantu.” Ekomami ata bongo te. Ezali nde: “Na Nkombo,” na moko, “ya Tata, Mwana, Molimo Mosantu.” *Tata* ezali nkombo te, *Mwana* ezali nkombo te, *Molimo Mosantu* ezali nkombo te; ezali ebiangelo.

Mikolo zomi sima na yango, Petelo atelemaki pe alobaki: “Bóbongola mitema, moko moko na bino, pe bóbatisama na Nkombo na Yesu Klisto.” Na bongo, asalaki nde likambo oyo Apekisaki ye kosala? Asalaki oyo Ayebisaki ye kosala. Nkombo ya Tata, Mwana, pe Molimo Mosantu ezali “Nkolo Yesu Klisto.” Moto nyonso na Kondimana ya Sika abatisamaki na Nkombo ya Nkolo Yesu Klisto.

⁹⁷ Moto moko te kati na Biblia atikálá kobatisama na bibiangelo ya Tata, Mwana, Molimo Mosantu. Yango etikálá kosalema te liboso kino ete endimeli ya Nicée étiana na Nicée, na Roma. Ezalaki molongo ya lingomba Katoliko, ezuaki, etatolaki likambo moko yango, na kati ya katekísimo. Nazali na yango, ya solo, *Bosolo Ya Kondima Na Biso*, pe bongo na bongo, ete

ezali mpenza endimeli ya Katoliko ya Roma. Bakoyebisa yo ete ezali kati na Biblia te; kasi balobaka ete bazali na makoki ya kobongola Maloba wana, soki balingi, mpo na pápa. Nazozua yango bongo te.

Yesu Klisto azali ndenge moko lobi, lelo, pe libela. “Pe moto oyo akolongola Liloba moko na Biblia oyo,” elobaki Yesu, “to oyo akobakisa liloba moko kati na Yango, eteni na ye ekolongolama na Buku ya Bomoi.” Liloba moko mpamba; molongo te, to paragraphe te, kasi Liloba moko mpamba! “Moto oyo akolongola Liloba moko . . .”

⁹⁸ Na ebandeli, Nzambe akembisaki bato na Ye ná Liloba na Ye. Liloba moko mpamba, oyo elimbolami mabe, ememaki liwa nyonso, mpasi ya motema nyonso, mawa nyonso. Eva, abukaki molongo moko te; abukaki nde Liloba moko. Ntango Yesu ayaki na katikati ya Buku. . . Oyo wana ezalaki na ebandeli ya Buku.

Ntango Yesu ayaki na katikati ya Buku, Alobaki nini? “Ekomami ete moto akobika kaka na lipa te, kasi na Liloba nyonso oyo ebimaka na monoko na Nzambe.”

Na suka ya Buku, Emoniseli mokapo ya 22, molongo ya 18, eteni mpenza ya suka ya Biblia, Yesu Ye moko azali koloba, Alobaki: “Natatoli ete moto nyonso oyo akolongola Liloba moko na Buku oyo, to akobakisa liloba moko likolo na Yango, eteni na ye ekolongolama na Buku ya Bomoi,” mpo azali mosakoli ya lokuta pe apesi bato ndimbola ya lokuta, pe makila na bango ekosengama na loboko na ye, mpo asali bongo.

⁹⁹ Tosengeli kobatela esika ya kosambela moko wana, elingi koloba, Yesu Klisto Liloba, oyo azali ndenge moko lobi, lelo, pe libela. Amen. Malamu. Bóbosana te, esika mosusu ya kokutana mpo na kosambela ezali te, esika ata moko te. Nzambe nde aponaki Yango.

¹⁰⁰ Yoane, kalakala mpenza, na katikati ya Kondimana ya Sika ná ya Kala. Bóyoka na bokebi sikoyo. Bólanda na bokebi. Yoane, mpongo monene wana, apumbwaki kouta na bilikí, mokolo moko, ná mapapu na ye ya minene efungwámá. Akitaki na libongo ya Yaladene, mosakoli-mpongo monene moko oyo akutanisaki Kondimana ya Kala ná ya Sika, pe abengaki bango uta na ngámbo ya mobali pe ya mwasi. Azalaki kobenga bato bábongola mitema.

Ntango Bafalisayi ná Basadukayi bayaki wana; alobaki: “Bóbanda komilobela te: ‘Abraham nde tata na biso’, mpamba te nayebisi bino, Nzambe akoki kotelemisa bana mpo na Abraham uta na mabanga oyo.” Oh! la la!

Ntango abandaki kosakola Nsango na ye, pe alobaki: “Ezali na Moko kati na bino, Oyo bino boyebi te. Namoni Ye naino te, kasi nakoyeba Ye ntango Akoya. Nabongi te kofungola nsinga ya sapato na Ye. Kasi Akobatisa bino na Molimo Mosantu pe na

Móto. Azali na epupoli na Ye na loboko na Ye; Akopetola mpenza esika na Ye, pe Akotumba matiti na Móto oyo ekufaka te.”

¹⁰¹ Mpongo monene ya Nsango-malamu wana azalaki wana, wana ákoganga pe kobangisa. Pe mbindo ebimaki, to Erode, nkumu ya ntango wana, mobeledi makambo, abalaki mwasi ya ndeko na ye. Pe bokoki kobanza ete mpongo monene ya Nsango-malamu wana ázala wana pe áfanda kimia na likambo wana?

Bamosusu kati na bango balobaki: “Komeka na yo koteya libala pe koboma libala te sikoyo, Yoane, mpo Erode azali kuna.”

¹⁰² Apusanaki mpenza liboso na ye pe alobaki: “Mobeko epesi yo nzela ya kozua mwasi oyo te.” Ya solo!

Nini, ye azalaki nini? Azalaki mpongo wana autaki na bilíki. Ayekolisamaki na nsé ya nsómo pe bobáangi ya bato te, ya denomination moko boye. Kasi ayekolisamaki na nsé na nguya ya Nzambe na Nguya-nyonso, mpo na koyeba likambo nini ekosalema. Ayebaki kotalisama polele ya Masiya.

Aleluya! Liloba yango elingi koloba: “Nkembo na Nzambe na biso!” Bóbanga te. Naticálá kosala moto mabe te. Namemami te. Nayebi mpenza esika nazali.

Oh, ntango nakanisaka ye, mpongo monene wana apumbwaki pe ayaki wana, pe akitaki wana! Alobaki: “Nakoyeba Ye, ntango Akoya.”

¹⁰³ Mokolo moko atelemaki wana, azoteya. Banganzambe bazalaki na ngámbo mosusu, balobaki: “Olingi koloba ete ntango moko ekoya oyo mbeka ya mokolo na mokolo ekolongwa; tempelo monene oyo totongi, pe mosala nyonso oyo tosali, biso denomination monene?”

Alobaki: “Ntango moko ekoya oyo nyonso wana ekolongolama.”

“Ekoki kosalema te. Ozali mosakoli ya lokuta!”

¹⁰⁴ Pe atambwisaki miso zingazinga. Alobaki: “Tala, Ye wana! Tala esika ya kosambela oyo Nzambe aponi. Mwana-mpate Ye wana, Mwana-mpate ya solo oyo alongolaka lisumu ya mokili.” Alobaki te: “Tala Methodiste koya, tala Batiste koya, to Katoliko.” Alobaki: “Tala Mwana-mpate na Nzambe oyo azali kolongola lisumu ya mokili.”

Esika ya kobatelama bobele moko oyo ezali, ezali kati na Mwana-mpate ya Nzambe wana. Bobele kati na Ye nde lobiko ezali; kati na lingomba moko te, na endimeli moko te, na libota moko te, na tata moko te, na mama moko te, na moto mosantu moko te, to na eloko moko te, na esika ya búlee moko te. Ezali kati na Nzambe ya búlee, Nkolo Yesu Klisto, esika oyo Nzambe atiaki Nkombo na Ye likolo na Moto moko, mpo na lisiko, Oyo afutaki ntalo mpo na biso basumuki. Yango nde esika bobele moko epai wapi lobiko ezali. Yango nde Libanga oyo natelemi likolo na yango.

¹⁰⁵ Yoane atalisaki Ye polele. Alobaki: “Nayebaki Ye te, ntango namonaki Ye kopusana, kasi kuna, epai natángaki. . .” Na seminére te, lokola papa na ye; lokola nganzambe te, oyo bayekolisi. Kasi na esóbé, epai azalaki na seminére ya likindo ya Nzambe na Nguya-nyonso, kozela Liloba na Nzambe; ezali te oyo etóngá ya bato babongisi, kasi oyo Nzambe asilaki koloba na ntina na Yango. Pe ntango Yoane atombolaki miso pe amonaki Molimo koya, alobaki: “Nazali kotatola, oyo ezali Ye.” Oh! la la!

Yango nde esika na yo ya kosambela. Yango nde esika na yo ya kobombama. Tala Mwana-mpate na Nzambe oyo alongolaka lisumu ya mokili. Lingomba moko te, endimeli moko te, to eloko mosusu te, kasi Mwana-mpate na Nzambe oyo alongolaka lisumu ya mokili.

¹⁰⁶ Bomoni ndenge Yoane afandisaki likambo yango? Alobaki te: “Bino Bafalisayi nde bolóngi, bino Basadukayi, Baerode.” Alobaki: “Tala Mwana-mpate.” Yango nde esika yango. Azali na Nkombo yango. Azali Ye. Nkombo mosusu te na nsé ya Lola!

¹⁰⁷ Bólanda ndenge Yesu alobaki mpo na Yoane sikoyo. Mokolo moko Yoane atindaki bato epai na Ye, kotala eloko nini Ye azalaki kosala. Yesu alobaki na ntina na ye ete: “Azalaki polé ya monene wana oyo ezalaki kongenga,” mpo na kolakisa bango nzela ya malamú, oyo basengelaki kolanda, liboso na boyei na Ye, boyei na Ye ya liboso. Bóyoka malamú. Bózanga yango te. Yesu alobaki: “Yoane azalaki pole yango.” Malaki 3, libunga ezali te! Mosakoli oyo ná pole ya monene kongenga, atalisaki Yesu ete azali bobele Moto yango, “Mwana-mpate.” Bana-mpate mosusu nyonso oyo banganzambe wana bazalaki kolobela, ná biloko mosusu nyonso wana, ezalaki boléma. Tala “Mwana-mpate!” Mobali yango azalaki polé monene ékongenga, ndenge Yesu alobaki.

Malaki 3 elobi: “Nakotinda motindami na Ngai liboso na Ngai mpo na kobongisa nzela.” Pe moto oyo atindamaki mpo na kobongisa nzela, atalisaki Ye polele, esika yango. “Ezali Ye! Libunga ezali te. Ezali Ye! Namoni elembo oyo ezali kolanda Ye. Nayebi ete ezali Ye; Polé moko ekiti uta na Likolo pe eyei likolo na Ye.” Ntembe moko ezalaki te, oyo wana ezalaki Ye.

¹⁰⁸ Na bongo, ndeko na ngai, nalingi kotuna yo likambo moko, mpo na kosukisa. Tokoki koloba boye. Na Malaki 4, balakaki pe biso mpongo mosusu, Likonzi ya Polé ya kolanda, mpo na kolakisa lingomba oyo ezali kotelengana lelo ete Ye azali Baebele 13:8, “ndenge moko lobi, lelo pe libela, boye te”? Balakaki biso ete mosusu akoya, akopumbwa uta na bilíki, boye te? Amen! Wana ezali mpenza Solo. Ekokani pe elongobani mpenza na Luka 17:30, epai wapi Mwana na moto (Mpongo) akozala komimonisa Ye moko mpo na kosilisa bisika ya kosambela mosusu nyonso, ndakisa ba-denomination pe bongo na bongo!

Nzambe aponaki esika na Ye. Yoane alobaki: “Tala Yango wana!”

¹⁰⁹ Na bongo, tosili kolakama likambo moko lelo oyo, Malaki 4: “Mpo na kozongisa mitema ya bana,” mpo na koloba ete Akúfá te, makambo oyo ezali mpo na eleko mosusu te; libatisi na Nkombo na Yesu ezalaki mpo na ntango wana te, kasi Azali ndenge moko sikoyo. Amen. Mpo na kosilisa bisika ya kosambela mosusu nyonso, yango nde oyo mpongo ya mikolo ya suka asengeli kosala, kolakisa ete nyonso oyo etikali ezali boléma, ete denomination ezali boléma, kasi mpo na kotalisa bango lisusu elembo yango moko oyo Asalaki, ete Azali ndenge moko lobi, lelo, pe libela. Aleluya!

¹¹⁰ Lisusu, na Emoniseli 4:7, tozalaki na Banyama minei oyo touti koyekola.

Ya liboso ezalaki, tomonaki . . . tomoni, ezalaki nkosi. Yango nde ezalaki Nyama ya liboso oyo ekendeki kosukisa m'ondengé ya mokolo wana, Nkosi ya Libota na Yuda.

Sima na Ye, Nyama mosusu elandaki. Pe tomoni ete Nyama oyo elandaki ezalaki ngombe, oyo ezali nyama ya mosala, mbeka. Na mikolo ya cathedrale ya ba-Roma, Lingomba ekufaki; mbeka.

Oyo elandaki, ezalaki moto, ezalaki Nyama oyo ezalaki na elongi ya moto. Pe moto yango ezalaki ba-reformateur, mayele ya kelasi ya moto, theologie, pe bongo na bongo.

Kasi Nyama ya suka oyo esengelaki kopumbwa, Nyama ya suka oyo esengelaki koya, Biblia elobi ete ezalaki mpongo oyo ezali kopumbwa. Aleluya! Pe mosakoli alobaki, ete na mokolo oyo: “Polé ekozala.” Oh! la la! “Na mokolo yango Polé ekozala.”

¹¹¹ Mokolo ya ba-reformateur ezalaki. Mokolo moko ezali, oyo ezali na mwa molili, ekoki kobengama mói to butu te. Kasi na ntango na mpokwa, na ntango na Mpongo:

Polé ekozala na ntango na Mpongo,
 Nzela moke ya Nkembo okomona yango solo;
 Na nzela ya mayi nde Polé ezali lelo,
 Wana okundami na Nkombo ya motuya ya
 Yesu.
 Bilenge pe mikóló, b'oyambola masumu na bino
 nyonso,
 Molimo Mosantu ekobatisa bino solo;
 Mpamba te Bapolé ya mpokwa eyei,
 Ezali solo ete Nzambe ná Klisto bazali Moko.

¹¹² Amen! Polé ekozala na ntango na mpokwa, esika bobele moko oyo Nzambe aponi mpo na kosambela. Oh, Nsango oyo eyei kosala nini, likambo nini Ye akosala? Pe na mokolo na Ye, Pole ekozala na ntango na mpokwa, pe (nini?) mpo na koyamba bana na Ye oyo bazongi ndako, na Mboka ya elaka ya solo, kaka na

elembo yango moko ya Likonzi na Móto oyo ekambaki bana na Yisraele na kati ya lisobe.

Esika oyo Nzambe aponi mpo na kosambela, Yesu Klisto. Yango nde esika bobele moko oyo ezali. Yango nde Nkombo bobele moko oyo Nzambe azali na yango mpo na lobiko. Yango nde nkombo Asili kopesa libota na Likolo, ntango ezali na mokili, ezali Yesu Klisto.

¹¹³ E lingomba, e libota, moninga mosumuki, kotia motema na eloko mosusu te bobele na Yesu Klisto. Kotia motema na motei moko te. Kotia motema na moto moko mosusu te mpo na kobikisa yo. Kotia motema na lingomba moko te, na endimeli moko te, na denomination moko te. Tia motema kaka na Yesu Klisto, mpo Ye nde Polé ya ntango.

Togumba mitó.

Polé ekozala na ntango na mpokwa,
 Nzela moke ya Nkembo okomona yango solo;
 Na nzela ya mayi nde Polé ezali lelo,
 Wana okundami na Nkombo ya motuya ya
 Yesu.
 Bilenge pe mikóló, bóyambola masumu na bino
 nyonso,
 Molimo Mosantu akokota solo;
 Bapolé ya mpokwa eyei,
 Ezali solo ete Nzambe ná Klisto bazali Moko.

¹¹⁴ Oh, ndeko mobali, ndeko mwasi, soki obongoli naino motema te, soki obatisami naino na Nkombo na Yesu Klisto te, okolinga kobanda na mpokwa oyo? Okolinga kopesa Nzambe libaku malamau ya koyamba yo na esika oyo okoki kosambela Ye? Bomikanisela, libanda na yango, esika moko ezali te oyo Nzambe alakaki kokutana na yo pe koyamba losambo na yo.

¹¹⁵ Okoloba: “Ndeko Branham, nasambelaka na bosembo mpenza!” Kaina pe asalaki yango. Apesaki mbeka ya ndenge nyonso oyo Abele asalaki, kasi ezalaki mbeka ya malamau te. Okendaka ntango mosusu na losambo, pe ofutaka bamoko na zomi oyo ya yo, pe osalaka mosala na yo ndenge Moklisto asengeli kosala, na bosembo nyonso lokola mobali to mwasi nyonso.

Natelemá awa eleki sikoyo mibu ntuku misato, bisika ebele na engumba oyo, pe nagangá Nsango moko oyo. Nazokóma mobange. Nakoki lisusu kozala na bino ntango molai mingi te. Kasi bómikanisela, na Mokolo ya Kosambisama, mongongo na ngai ezali kotiamana na bande, pe ekotelemela bino.

¹¹⁶ Ezali na esika bobele moko, oyo Nzambe atii Nkombo na Ye, ezali na lingomba te, kasi kati na Yesu. Ezali na esika ya kosambela bobele moko, esika bobele moko oyo okoyambama, ezali kati na Molingami, Yesu Klisto. “Nkombo mosusu ezali

te, na nse ya Lola, oyo epesami na bato, mpo na kobikisama,” lingomba moko te, endimeli moko te, eloko moko te. Yesu Klisto!

Yango nde esengeli kozala Nsango ya ntango, “Kozongisa mitema ya bana na Kondima oyo epesamaki na basantu, mbala moko mpo na libela.” Okolinga koyamba Yango na mpokwa oyo te?

Wana togumbi mitó.

¹¹⁷ Pe baoyo bakolinga ete tókanisa bango na libondeli, bokoki kotombola bobele maboko. Tokoki kobenga bato na etumbelo te, mpo bato baleki ebele. Nzambe ápambola bino. Oh! la la! Na loboko na ngai ya mwasi, nabanzi bazali nkama misato.

¹¹⁸ Sikoyo na loboko na ngai ya mobali, bokoki kotombola maboko, koloba: “Nalingi ete ókanisa ngai.” Nabanzi bazali monkama na ntuku mitano, to koleka, na loboko na ngai ya mobali.

Tozali na tabernacle awa, ezali ná piscine monene ná mayi; mokengeli, mokengeli malamú, Ndeko Orman Neville, ba-associé, mibali oyo bazali awa, oyo bomonaka pe bokutanaka. Mikolo nyonso, butu nyonso, ngonga nyonso, baoyo balingi kobatisama, oyo babongoli mitema, ezali ntango nyonso kozela. Pe soki otosi mobeko yango, ondimisami mpenza, na nzela ya elaka ya Nzambe, soki ozali sémbo na motema na yo, mpo na kozua libatisi ya Molimo Mosantu.

¹¹⁹ Esika ya kosambela ezali bobele moko. Sikoyo, ezali na tabernacle te. Ezali nde kati na Klisto. Ndenge nini bakotaka kati na Ye? “Na Molimo moko, biso nyonso tobatisami na kati ya Nzoto moko oyo.”

Tóbondela.

¹²⁰ Nzambe molingami, wana maboko oyo etombwamaki, etalisaki oyo ezalaki na nse ya loboko yango, kati na motema, kondima ya solosolo ete bayebi malamú ete bazali na mposa ya lisungi na Yo. Nabondeli mpo na moko moko na bango, Tata. Pe nakoloba Liloba na Yo. Olobaki: “Moto oyo akoyoka Liloba na Ngai, pe akondima Ye oyo atindi Ngai, azali na Bomoï na seko, pe akoleka na Kosambisama te; kasi asili koleka longwa na kufa kino na Bomoï.”

Tata, kokende kaka mwa bampóso libanda na engumba oyo, soki nazongi, natunaki: “Bongo songolo *oyo?*”

“Ee, asíli kokende.”

“Ee, bongo . . .”

“Basila kokende.”

¹²¹ Nzambe molingami, moko na moko, tozali kobengama, moko na moko, tosengeli kokutana na móndengé ya koleka na lobwaku ya elilingi ya liwa. Pe esengeli kosalema mpo na moko na moko na biso, lokola bato bakufi. Kasi, na mpokwa oyo, Osili kopesa

biso lisengi na Yo, ete soki tokondimela Ye pe tobatisami na Nkombo na Ye, Okokotisa biso. Na sima, kati na Nzoto oyo, Nzoto ya Klisto, kati na lingomba te, kasi kati na Nzoto ya Klisto, Nzoto yango esilá kosambisama. Ekosengela koleka na kosambisama te. Nzambe asopaki nkanda na Ye likolo ya nzoto yango, pe nzoto yango ezali na lisumu te; pe, lokola tozali kati na Ye, asikoli biso na lisumu, na nzela ya Mbeka na Ye ya lisumu oyo ekufaki mpo na biso. Pe na kati kuna, tozali na boyokani bamoko na bamosusu, wana Makila na Yesu Klisto, Mwana na Nzambe, ezali kobatela biso peto, longwa na masumu pe mbindo nyonso.

¹²² Tata Nzambe, nabondeli ete Ókamata moko na moko na bango kati na Bokonzi na Yo. Kokisa yango, Nzambe. Tika ete moko te kati na bango ábunga; ézala mwana mobali to mwana mwasi moko te, mobali to mwasi moko te. Nkolo, bandeko na ngai moko bazali awa, na mpokwa oyo, baoyo bazali na nse ya Makila wana te. Nazali mpenza komikanisela maloba ya papa na ngai! Pe nabondeli, Nzambe Molingami, ete moko te kati na bango ábunga. Kokisa yango, Nkolo. Nazondima Yo sikoyo, na oyo nyonso nazali na yango mpo na kondima.

¹²³ Sala kati ya bandeko na ngai ya mibali, ya basi, na baninga na ngai, oyo bazali awa na esika oyo na mpokwa oyo pe oyo bazali mosika, na nzela ya telefone. Bitúka ndenge na ndenge bazali koyoka, bandá na Libongo ya Esti kino na oyo ya Westi. Nabondeli, Nzambe Molingami, mpo na baoyo bazali kuna na ngámbo ya bilíkí ya Tucson, kuna na ngambo ya Californie, likolo na Nevada pe na Idaho, kuna na Esti pe na zinga-zinga, kuna na Texas; wana mbela oyo epesami, bato bazali na kati ya—ya ba-losambo mikemike, na ba-station ya essence, na bandako, bazali koyoka. E Nzambe, tika ete mobali to mwasi, elenge mobali to elenge mwasi oyo abúngá, na ngonga oyo, áyá epai na Yo. Kokisa yango sika-sikoyo. Tosengi yango na Nkombo na Yesu, ete bámona esika ya kobatelama oyo, wana ntango ezali naino.

Ntango, tozali komona loboko kokoma na etutú, mabelé ebandi kokóma mbutumbutu, ntango ya lisiko ekómi pene. Eteni ya ekólo na biso ezali kozinda, eteni mosusu ezali kopusana pe kopanzana na koningana ya mabelé, ndenge Yesu alakaki ete ekosalema. Tika ete ezua ntango molai te mpo na bango, Nkolo. Tika ete báyamba yango sikoyo, mpo topesi bango epai na Yo lokola bitólé ya liyangani, ya Nsango-malamu, na Nkombo na Yesu. Amen.

¹²⁴ Bondimi Ye? Nzambe ápambola bino. Bato boni bandimi ete ezalí Solo, na loboko na ngai ya mwasi? Bótombola loboko. Bato boni na loboko na ngai ya mobali? Bótombola loboko. Nzambe ápambola bino. Na ndenge nakomona, ezali bato nyonso. Ezali Solo, baninga. Nzambe ayebi ete ezali ya solo.

¹²⁵ Sikoyo, wana tozali kati na Ye, pe lokola tozali kati na Ye, bokoki kozua biloko nyonso oyo Ye akufelaki. Pe Akufaki mpo na nini? “Azokisamaki mpo na masumu na biso, abetamaki mpo na lisumu na biso ya nkó; etumbu oyo epesaka biso kimia etiamaki likolo na Ye, pe na mapipi na Ye tobikisamaki.” Bondimi yango? Bondimi mbeka na Ye ya lisumu mpo na lobiko ya nzoto sikoyo?

¹²⁶ Babeli bazali katikati na biso? Bátombola maboko, na ngámbo ya mobali to ya mwasi. Babeli bazali mingi mpenza. Nakoki kobenga bato na molongo te. Bomoni, nazangi . . . bakoki komata na etumbelo te. Makoki ya kosala yango ezali te.

Bazali na mayangani ya mabondeli kuna na bisika mosusu, mpo na babeli, na ba-losambo pe nyonso wana, kuna na tabernacle.

Nakosenga bino eloko moko. Bandimi boni bazali awa? Bótombola loboko. Malamu. Nakotángela bino Liloba, yango ezali Klisto. Etinda ya suka oyo Yesu apesaki na mokili, kútu, na Lingomba nde, Alobaki boye: “Bilembo oyo ekolanda baoyo bakondima; soki batieli babeli maboko, bakobika.” Bato boni bayebi ete ezali ya solo, Malako 16, báloba: “Amen.” [Losambo balobi: “Amen.”—N.D.E.] Malamu. Nasengi yo lokola mondimi ete ótiela moto moko maboko, liboso na yo. Tiela moto moko maboko, liboso na yo, pe tika ete moko na moko na biso ábondela, moko mpo na mosusu sikoyo. Tiela moto moko maboko, zingazinga na yo.

¹²⁷ Nkolo, engóngóló moko ya miswále ezali liboso na ngai awa, mwa biteni na bilamba; mama moko alali na esika moko boye, azali kobunda na liwa, bebé moko akómi pene na liwa, babeli bipai na bipai. Totángaka na Biblia ete bazalaki kozua miswále pe bilamba oyo ezalaki komama nzoto ya Polo, pe bazalaki kotia yango likolo na babeli; pe milimo mabe, milimo ya mbindo, maládi, pe bokono, ezalaki kotika bato. Sikoyo, Nkolo, toyebi ete tozali Santu Polo te, kasi toyebi ete Yo ozali Yesu kino lelo, esika ya kosambela bobele moko oyo Nzambe abongisi. Pe sikoyo, lelo, bato oyo batatoli ete bazali na kondima moko wana, ete bandimi lokola bato wana. Na ntembe te, Osili kobongisa nzela moko mpo na bango! Natii maboko na ngai likolo ya miswále oyo pe nasengi ete maladi ná ba-mpasi étika nzoto ya baoyo miswále oyo ekotiana likolo na bango na Nkombo na Yesu Klisto.

¹²⁸ Sikoyo, balakisaki biso ete ntango Yisraele azalaki kobima na Ezipito, kati na nzela ya lotomo, bazalaki kokende na mboka na elaka. Mbu Motane ekangaki bango nzela. Pe Nzambe akitisaki miso na nzela ya Likonzi na Móto, pe mbu ebangaki, ezongaki sima, pe etikaki Yisraele áleka kino na mboka na elaka. E Nzambe, kitisa miso na nzela ya Makila na Yesu, na mpokwa oyo, pe tika ete maladi ézonga sima, pe Satana ábwakama libanda. Pe tika ete bato báleka kino na elaka wana ya bokolongonu ya nzoto pe ya nkongo, ndenge Nzambe

alobaki: “Likolo na nyonso, Nakosepela ete bófúluka na nzoto kolongonu.”

¹²⁹ Sikoyo ndenge Ozali komona kuna, Nkolo Yesu, maboko ya bato oyo etiami bamoko likolo na bamosusu, ezali kotalisa elembo ya kondima na bango, ete Olobaki: “Bilembo oyo ekolanda baoyo bakondima.” Bazali kobondela na ndenge na bango, bamoko mpo na bamosusu. Moto oyo alandi azali kobondela mpo na bango.

¹³⁰ Sikoyo, Nkolo, móndengé yango elongolami, Satana, mokosi monene, azali na makoki ya kokanga mwana ya Nzambe te. Azali ekelamu moko asili kolongama. Yesu Klisto, esika ya kosambela bobele moko, Nkombo bobele moko ya solo, alongaki ye na Kalvari. Pe tobeleli Makila na Ye sika-sikoyo, ete Alongaki maladi nyonso, bokono nyonso.

Pe napesi mitindo na Satana ete átika eyanganelo oyo. Na Nkombo na Yesu Klisto, bima na bato oyo, pe bákoma na bonsomi.

¹³¹ Moto nyonso oyo andimi kobikisama na bango kokokana na Liloba oyo ekomami, átatola yango na kotelema pe koloba: “Nandimi sikoyo kobikisama na ngai na Nkombo na Yesu Klisto.” Telema.

Nzambe ákumisama! Tala yango wana. Bótala awa, ndenge bibósono pe babeli ndenge na ndenge bazali kotelema. Nzambe ákumisama! Yango mpenza. Ndima kaka. Azali awa. Kitoko mingi!

¹³² Kuna na eyanganelo, na libanda, na ba-telefone, bosengelaki komona! Nakanisi ete moto nyonso awa, na boyebi na ngai nyonso, to mingi kati na bango, batelemi sikoyo. Oh, ntango malamau mpenza! Bozali na Nkolo, yango nde! “Esika Bozali na Nkolo ezali, bonsomi ezali, nsomi ezali.” Molimo ya Nzambe epesaka biso nsomi.

¹³³ Sikoyo lokola Asili kobikisa biso na bokono, tondimi yango. Asili kobikisa biso na molimo; tondimi yango. Baoyo balingi kozua libatisi, mayi ezali awa. Ata na ntango nini, ata na ngonga nini oyo olingi koya, moto moko akozala wana mpo na kosala yango.

Sikoyo nakanisi, liboso ete tósilisa, tosengeli koyemba loyembo moko ya kala ya lingomba. “Nalingi Ye, nalingi Ye mpo Alingaki ngai liboso.” Tótombola maboko epai ya Nzambe pe tóyemba yango na motema mobimba!

Tokosepela kokutana na bino awa na ntongo, na ngonga ya libwa na ndambo, kaka na ndako moko oyo, mpo na liteya ya *Libala Pe Koboma Libala*. Malamau.

Sikoyo tóyémba yango elongo.

Nalingi Ye,

Tika ete eyanganelo monene oyo éyemba yango sikoyo!
Baoyo bazali kolanda na ba-telefone, bino pe bóyemba yango.

Mpo Alingaki ngai liboso
Pe asombi lobiko na ngai
Likolo na Ekulusu.

¹³⁴ Esalemaki wapi? Likolo na Ekulusu. Wana tozali koyemba yango lisusu, nalingi ete ópésa mbote ya loboko na moto moko zingazinga na yo, loba: “Nzambe ápambola yo, moleki-nzela.”

Na . . . (. . . ? . . .)
Mpo Alingaki ngai . . .
Pe asombi lobiko na ngai
Likolo . . .

¹³⁵ Oh, bolingi Ye, boye te? [Losambo balobi: “Amen.”—N.D.E.] Azali malamú mingi, boye te? [“Amen.”] Azali Esika na bino ya Kobombama? [“Amen.”] Azali Libanga na mokili ekaúká, Ekimelo na ntango ya mopepe makasi, Ebombamelo bobele moko oyo ngai nayebi. Yango wana:

Kondima na ngai etaleli Yo,
Yo Mwana-mpate ya Kalvari,
Nzambe Mobikisi;
Sikoyo yoka ngai wana nazalí kobondela,
Longola kokweisama na ngai nyonso,
Tika ete banda lelo
Nákóma mobimba wa Yo!

Tótombola maboko wana tozali koyemba yango.

Kondima na ngai etaleli Yo,
Yo Mwana-mpate ya Kalvari,
E Nzambe Mobikisi;
Sikoyo yoka ngai wana nazalí kobondela,
Longola masumu na ngai nyonso,
Oh tika ete banda lelo
Nákóma mobimba wa Yo!

Tógumba mitó sikoyo, wana tozali koyemba yango na nse na mongongo.

Ezali ngai kotambola na molili ya bomoi,
Pe mawa ezingi ngai,
Yo zala Mokambi na ngai;
Bongola molili ékóma polé,
Longola mpisoli ya mawa,
Kotika te ete nábunga lisusu
Mosika na Yo.

Wana bogumbi mitó, mokengeli na biso molingami, Ndeko Orman Neville, akosilisa liyangani.



ESIKA YA KOSAMBELA OYO NZAMBE APONI LIN65-0220
(God's Chosen Place Of Worship)

Liteya ya Ndeko William Marrion Branham oyo, eteyamaki liboso na Anglais na mokolo ya mpóso na mpokwa, mokolo ya 20, sanza ya mibale, na mobu 1965, na Ecole Secondaire Parkview na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org